



水經注釋卷五

仁和趙一清誠夫錄

河水五

漯水

又東至鄧湛水從北來注之

河水又東逕河陽縣故城南春秋經書天王狩於河陽

壬申公朝于王所晉侯執衛侯歸于京師春秋左傳僖

公二十八年冬會于溫執衛侯是會也晉侯召襄王以

諸侯見且使王狩仲尼曰以臣召君不可以訓故書曰

天王狩于河陽言非其狩地服虔賈逵曰河陽溫也班

固漢書地理志司馬彪袁山松

一清按通鑑晉紀吳國內史袁崧胡三省曰袁

崧當作袁山松此本晉書列傳耳按傳袁山松有名無字諸本亦有作崧者豈山松即崧之字而以字行者耶郡國志晉太康地道記十三州志河陽別縣非溫邑也漢高帝六年封陳涓為侯國王莽之河亭也十三州志曰治河上河孟津河也郭緣生述征記曰踐土今冶坂城是名異春秋焉非今河北見者河陽城故縣也在冶坂西北蓋晉之溫地故羣儒有溫之論矣魏土地記曰冶坂城舊名漢祖渡城嶮固南臨孟津河洛陽西北四十二里故鄧鄉矣河水又逕臨平亭北帝王世紀曰光武葬臨平亭南西望平陰者也河水又東逕洛陽縣北河之南岸有一碑北面題云洛陽北界津水二渚分屬

之也上舊有河平侯祠祠前有碑今不知所在郭頌世語曰晉文王之世大魚見孟津長數百步高五丈頭在

南岸尾在中渚河平侯祠即斯祠也河水又東逕平縣

故城北漢武帝元朔三年封濟北貞王子劉遂為侯國

沈氏曰漢表作濟北式王子此從史表又史表貞王子十一人其五人漢表以為式王子莫可考也王莽

之所謂治平矣俗謂之小平也有高祖講武場河北側

岸有二城相對置北中郎府徙諸徒隸府戶并羽林虎

賁領隊防之河水南對首陽山春秋所謂首戴也夷齊

之歌所矣曰登彼西山上夷齊之廟前有二碑並是

後漢河南尹廣陵陳導洛陽令徐循與處士平原蘇騰

南陽何進等立事見其碑

全氏曰按續漢書五行志注引蔡邕作夷齊廟碑熹平五

年天下大旱禱請名山處士平陽蘇騰字元成夢陟首陽有神馬之使在道明覺而思之以夢陟上聞詔使者登山升祠天尋雨是即善長所云事具其碑也又有周

然是平陽非平原考洪氏隸釋所引則是平原又有周公廟魏氏起元武觀於芒垂張景陽元武觀賦所謂高

樓特起竦踣岩堯直亭亭以孤立延千里之清飈也朝

廷又置冰室於斯阜室內有冰井春秋左傳日日在北

陸而藏冰常以十二月採冰於河津之隘峽石之阿北

陰之中即邠詩二之日鑿冰沖沖矣而內於井室所謂

納於凌陰者也河南有鉤陳壘世傳武王伐紂八百諸

侯所會處尚書所謂不期同時也紫微有鉤陳之宿主

鬪訟兵陣故遁甲攻取之法以所攻神與句陳并氣下

制所臨之辰則祆禽敵是以壘資其名矣河水至斯有

盟津之目論衡曰武王伐紂升舟陽侯波起疾風逆流

武王操黃鉞而麾之風波畢除中流白魚入于舟熿以

告天與八百諸侯咸同此盟尚書所謂不謀同辭也故

曰孟津亦曰盟津尚書所謂東至于孟津者也又曰富

平津晉陽秋曰杜預造河橋於富平津所謂造舟為梁

也又謂之曰陶河魏尚書僕射杜畿以帝將幸許試樓

船覆於陶河謂此也昔禹治洪水觀於河見白面長人

魚身出曰吾河精也授禹河圖而還於淵及子朝篡位

與敬王戰乃取周之寶玉沈河以祈福後二日津人得之於河上將賣之則變而為石及敬王位定得玉者獻之復為玉也河水又東沮水入焉山海經曰和山上無草木而多瑤碧實惟河之九都是山也五曲九水出焉合而北流注于河其陽多倉玉吉神泰逢司之是好居於蒼山之陽出入有光呂氏春秋曰夏后氏孔甲田於東陽蒼山遇大風雨迷惑入於民室皇甫謐帝王世紀以為即東首陽山也蓋是山之殊目矣今於首陽東山無水以應之當是今古世懸川域改狀矣全氏曰按魏武德郡溫縣有貝水子謂善長尚未能詳貝水之顛末則地形志所言亦襲舊文書之耳竊疑是沮梁之沮水

而誤為沮字蓋沮水正流入河支流入濟適當溫原之地善長偶有不照遽引山經之言滑突了之而云無水以應川域改狀則不識沮水之為誤文也昔帝堯修壇河洛擇良議沈率舜等升於首山而導河渚有五老遊焉相謂河圖將來告帝以期知我者重瞳也五老乃翻為流星而升於昴即於此也又東涉水注焉

又東過鞏縣北

河水於此有五社渡為五社津

一清按章懷後漢書註引水經注曰五社津一

名土社津蓋異名也

建武元年朱鮪遣持節使者賈彊討難將軍

蘇茂將三萬人從五社津渡攻溫馮異遣校尉與寇恂合擊之大敗追至河上生擒萬餘人投河而死者數千

人縣北有山臨河謂之崆嶺邱其下有穴謂之鞏穴言潛通淮浦北達於河直穴有渚謂之鮪渚成公子安大河賦曰鱣鯉王鮪暮春來遊周禮春薦鮪然非時及佗處則無故河自鮪穴已上又兼鮪稱呂氏春秋稱武王伐紂至鮪水紂使膠鬲候周師卽是處也

洛水從縣西北流注之

洛水於鞏縣東逕洛汭北對琅邪渚入於河謂之洛口矣自縣西來而北流注河清濁異流皦焉殊別應瑒靈河賦曰資靈川之遐源出崑崙之神邱涉津洛之阪泉播九道於中州者也

又東過成臯縣北濟水從北來注之

河水自洛口又東左逕平臯縣南又東逕懷縣南濟水故道之所入與成臯分河河水又逕黃馬坂北謂之黃

馬關孫登之去楊駿作書與洛中故人處也河水又東

逕旋門坂北今成臯西大坂者也升陟此坂而東趣成臯也曹大家東征賦曰望河洛之交流看成臯之旋門者也河水東逕成臯大伾山下爾雅曰山一成謂之伾許慎呂忱等並以爲邱一成也孔安國以爲再成曰伾亦或以爲地名非也尙書禹貢曰過洛汭至大伾者也鄭康成曰地喉也沈出伾際矣然則大伾在河內修武

武德之界沛沆之水與滎播澤出入自此然則大伾即

是山矣禹貢錐指曰鄭元云大伾在修武武德之界張揖云成臯縣山也漢書音義有臣瓚者以為修

武武德無此山也成臯縣山又不一成今黎陽縣山臨河豈不是大伾乎又曰薛士龍曰大伾山許慎說文今

黎陽之黎山是其說不始于臣瓚矣今按伾二字說文俱無伾字下引詩以車伾伾字下云邱再成者與

孔傳同並無薛所稱語慎有五經異義或出其中然宋

時此書已亡薛何由見且鄭康成生于慎後張揖三國

魏人可見漢魏時未有指黎山為大伾者實臣瓚倡之

酈元猶不從從瓚自穎達始此後人勝前人處薛所稱

疑是徐鍇說文繫傳語出楚金誤為叔重耳又云大伾

山在汜縣西一里有大澗九曲一名九曲山西去洛口

裁四十里非禹貢之大伾山明甚 伾北即經所謂濟水從北來注之者

也今沛水自溫縣入河不于此也所入者奉溝水耳即

沛沆之故瀆矣禹貢錐指曰濟水於武德入河南直成臯今汜水河陰之界是也其後由溫縣

入河則南直鞏縣所謂津渠勢改不與昔同者也今其

故道盡陷河中濟水唯從枝津之合溟水者至孟縣東

南入河南直孟津縣其流益短矣成臯縣之故城在伾

由大禹而來濟入河之道凡再變 上滎帶伾阜絕岸峻周高四十許丈城張翕嶮崎而不

平春秋傳曰制嚴邑也虢叔死焉即東虢也魯襄公二

年七月晉成公與諸侯會于戚遂城虎牢以逼鄭求平

也蓋修故耳穆天子傳曰天子射鳥獵獸於鄭圃命虞

人掠林有虎在於葭中天子將至七萃之士高奔戎生

擒虎而獻之天子命之為柙畜之東虞全氏曰按東虞漢志師古注作

東虢是也元和志是曰虎牢矣然則虎牢之名自此始引此文作東隅也秦以為關漢乃縣之城西北隅有小城周三里北面

列觀臨河茗茗孤上景明中言之壽春路直茲邑昇眺
清遠勢盡川陸羈途遊至有傷深情河水南對玉門昔
漢祖與滕公潛出濟於是處也門東對臨河側岸有土
穴魏攻北司州刺史毛德祖於虎牢戰經二百日不尅
城惟一井井深四十丈山勢峻峭不容防捍潛作地道
取井余頃因公至彼故往尋之其穴處猶存河水又東
合汜水水南出浮戲山世謂之曰方山也北流東關水
出於嵩渚之山也泉發于層阜之上二源兩枝分流瀉
注世謂之石泉水也東流爲索水西注爲東關水西北
流楊蘭水注之水出非山西北流注于東關水又西北

清水入焉水自東浦西流與東關水合而亂流注于汜
汜水又北右合石城水水出石城山其山複澗重嶺欹
疊若城山頂泉流瀑布懸瀉下有濫泉東流洩注邊有
數十石畦畦有野蔬巖側石窟數口隱跡存焉而不知
誰所經始也又東北流注于汜水汜水下北合鄆水水
西出婁山至冬則煖故世謂之溫泉東北流逕田鄆谷
謂之田鄆溪水東流注於汜水汜水又北逕虎牢城東
漢破司馬欣曹咎於是水之上汜水又北流注于河征
艱賦所謂步汜口之芳草弔周襄之鄙館者也余按先
儒之論周襄所居在潁川襄城縣是乃城名非爲水目

原夫致繆之由俱以汜鄭為名故也是為爽矣又按郭緣生述征記劉澄之永初記並言高祖即帝位於是水之陽今不復知舊壇所在盧諶崔雲亦言是矣余按高皇帝受天命于定陶汜水又不在此也於是求壇故無髣髴矣河水又東逕板城北有津謂之板城渚口河水又東逕五龍塢北臨長河塢有五龍祠應劭云崑崙山廟在河南滎陽縣疑即此祠所未詳

又東過滎陽縣北菴蕩渠出焉

大禹塞滎澤開之以通淮泗即經所謂菴蕩渠也

全氏曰以

滎澤為禹所塞善長之繆極矣一清按禹貢豫州云滎波既豬禹陂水為澤故道元濟水注云大禹塞其淫水

則指既豬而言此言禹塞滎澤辭不達意未為大非惟云開之以通淮泗則指鴻溝為禹迹乃其繆耳

漢平帝之世河汴決壞未及得修汴渠東侵日月彌廣水門故處皆在河中漢明帝永平十二年議治汴渠上乃引樂浪人王景問理水形便景陳利害應對敏捷帝甚善之乃賜山海經河渠書禹貢圖及以錢帛後作堤發卒數十萬詔景與將作謁者王吳共築堤防修塌起自滎陽東至千乘海口千有餘里景乃商度地勢鑿山開澗防遏衝要疏決壅積十里一水門更相洄注無復滲漏之患明年渠成帝親巡行詔濱河郡國置河堤員吏如西京舊制景由是顯名王吳及諸從事者皆增秩一等

順帝陽嘉中又自汴口以東緣河積石為堰通古渠口
咸曰金堤靈帝建寧中又增修石門以遏渠口水盛則

通注津耗則輟流禹貢雖指曰司馬彪不志河渠東漢以後無可考據賴有水經注存其所

敘當時見行之河自涼城縣長壽津東逕鐵邱南至東

北逕甲下邑北又東北入于海皆東漢以後大河之所

行也又曰王景修渠築堤自滎陽東至千乘海口千餘

里則其所治者即東漢以後大河之經流也而史稱汴

渠又曰汴渠成始終皆不言河蓋建都洛陽東方之漕

全資汴渠故惟此為急河汴分流則運道無患治河所

以治汴也自平帝之後汴流東侵日月益甚建武十年

陽武令張汜上言河決積久侵毀濟渠漂數十許縣是

其時濟亦決敗矣莽時河入濟南千乘則侵濟處更多

故築堤自滎陽至千乘海口千餘里永平十三年詔曰

河汴分流復其舊迹陶邱以北漸就墳壤十五年景從

駕東逕至無鹽帝美其功拜河堤使者賜車馬縑錢陶

邱今定陶無鹽今東平皆濟水所經之地也二渠既成

則東南之漕由汴入河西北之漕由濟入河舳舻千里

輓輸不絕京師無匱乏之憂矣又曰武帝疎于討論執

北瀆為禹河及哀平之世人始有知禹河之所經者意

欲復禹故道而國事阡危事不可為矣永平上距平帝

時僅六十餘歲故道豈遽堙滅而王景治河惟從事汴

濟蓋當時所急在運道就其便者為之不暇遠圖耳史

稱景鑿山阜截溝澗防遏衝要疏決壅滯十里立一水

門費以百億計財力之充裕若是向使講求禹迹故道

而復之則河流歸北汴濟不勞而治功施到今五代以

降潰溢橫流之禍可以免矣惜乎其見不及此也河雖

徙自周定王時而東光以下至章武入海猶是徒駭之

故道至王莽時始改從千乘入海而景遂

因之禹迹蕩然無存君子於此有遺憾焉

河水又東北

逕卷之扈亭北春秋左傳曰文公七年晉趙盾與諸侯

盟于扈竹書紀年晉出公十二年河絕於扈即於此也

河水又東逕八激堤北漢安帝永初七年令謁者太山

于岑於石門東積石八所皆如小山以捍衝波謂之八

激堤河水又東逕卷縣北晉楚之戰晉軍爭濟舟中之指可掬楚莊祀河告成而還卽是處也河水又東北逕赤岸固北而東北注之

又東北過武德縣東沁水從西來注之

河水自武德縣漢獻帝延康元年封曹叡爲侯國卽魏明帝也東至酸棗縣西濮水東出焉漢興三十有九年孝文時河決酸棗東潰金堤大發卒塞之故班固云文堙棗野武作瓠歌謂斷此口也今無水河水又東北通謂之延津石勒之襲劉曜途出於此以河冰泮爲神靈之助號是處爲靈昌津昔澹臺子羽齎千金之璧渡河

陽侯波起兩蛟挾舟子羽曰吾可以義求不可以威劫操劍斬蛟蛟死波休乃投璧於河三投而輒躍出乃毀璧而去示無恠意趙建武中造浮橋於津上採石爲中濟石無大小下輒流去用功百萬經年不就石虎親閱作工沈璧于河明日璧流渚上波蕩上岸遂斬匠而還河水又逕東燕縣故城北則有濟水自北來注之河水於是亦有棘津之名亦謂之石濟津故南津也春秋僖公二十八年晉將伐曹曹在衛東假道於衛衛人不許還自南河卽此濟也河水於是亦有石濟之名晉伐陸渾亦於此渡宋元嘉中遣輔國將軍蕭斌率寧朔將軍王元

謨北入宣威將軍垣護之以水軍守石濟卽此處也清

按石濟資治通鑑作文石津懷帝紀永嘉四年石勒爲王讚所敗退屯文石津胡三省曰據帝紀文石津在河

北又據永嘉六年勒自葛陂北行至東燕使孔萇自文石津潛渡枋頭取向永船則文石津在東燕之東北枋

頭之東南蓋濟者津渡之名非四瀆之濟并非常山之石濟也河水又東淇水入焉又

東逕遮害亭南漢書溝洫志曰在淇水口東十八里有

金隄隄高一丈自淇口東地稍下隄稍高至遮害亭高

四五丈又有宿胥口舊河水北入處也河水又東右逕

滑臺城北一清按何氏焯曰自滑臺城北至長壽津皆古潒也胡東樵亦以爲然詳見河水又東至

東光縣故城西而北與漳水合下城有三重中小城謂之滑臺城舊傳

滑臺人自修築此城因以名焉城卽故鄭廩延邑也下

有延津春秋傳曰孔悝爲蒯瞶所逐載伯姬于平陽行

于延津是也一清按今本左傳哀十六年載伯姬于平陽而行及西門無于延津字蓋酈氏所見

之書異矣廩延南故城卽衛之平陽亭也今時人謂此津爲

延壽津宋元嘉中右將軍到彥之畱建威將軍朱修之

守此城魏軍南伐修之執節不下其母悲憂一旦乳汁

驚出母乃號踴告家人曰我年老非有乳時今忽如此

吾兒必沒矣修之絕援果以其日陷沒城故東郡治續

漢書曰延熹九年濟陰東郡濟北平原河水清襄楷上

疏曰春秋注記未有河清而今有之易乾鑿度曰上天

將降嘉應河水先清京房易傳曰河水清天下平天垂

異地吐妖民厲疾三者並作而有河清春秋麟不當見而見孔子書以爲異河者諸侯之相清者陽明之徵豈獨諸侯有窺京師也明年宮車晏駕徵解瀆侯爲漢嗣是爲靈帝建寧四年二月河水又清也

又東北過黎陽縣南

黎侯國也詩式微黎侯寓于衛是也晉灼曰黎山在其南河水逕其東其山上碑云縣取山之名取水之陽以爲名也王莽之黎蒸也今黎山之東北故城蓋黎陽縣之故城也山在城西憑山爲基東咀於河故劉楨黎陽山賦曰南蔭黃河左覆金城青壇承祀高碑頌靈昔

慕容元明白鄴率衆南徙滑臺旣無舟楫將保黎陽昏而流澌冰合於夜中濟訖旦而冰泮燕民謂是處爲天橋津東岸有故城嶮帶長河戴延之謂之遼明壘周二十里言遼明石勒十八騎中之一城因名焉郭緣生日城袁紹時築皆非也余按竹書紀年梁惠成王十一年鄭釐侯使許息來致地平邱戶牖首垣諸邑及鄭馳道我取枳道與鄭鹿卽是城也今城內有故臺尙謂之鹿鳴臺又謂之鹿鳴城王元謨自滑臺走鹿鳴者也濟取名焉故亦曰鹿鳴津又曰白馬濟津之東南有白馬城衛文公東徙渡河都之故濟取名焉袁紹遣顏良攻東

郡太守劉延於白馬關羽爲曹公斬良以報効卽此處也白馬縣有韋鄉韋城故津亦有韋津之稱史記所謂下修武渡韋津者也河水舊於白馬縣南洑通濮濟黃溝故蘇代說燕曰決白馬之口魏無黃濟陽竹書紀年梁惠成王十二年楚師出河水以水長垣之外者也金堤旣建故渠水斷尙謂之白馬瀆故瀆東逕鹿鳴城南又東北逕白馬縣之涼城北者舊傳云東郡白馬縣之神馬亭實中層峙南北二百步東西五十許步狀邱斬城也自外耕耘墾斫削落平盡正南有躔陞陟上方軌是由西南側城有神馬寺樹木修整西去白馬津可二

十許里東南距白馬縣故城可五十里疑卽開山圖之所謂白馬山也山下常有白馬羣行悲鳴則河決馳走則山崩注云山在鄭北故鄭也所未詳劉澄之云有白馬塞孟達登之長歎可謂于川土疎妄矣亭上舊置涼城縣治此白馬瀆又東南逕濮陽縣散入濮水所在決會更相通注以成往復也河水自津東北逕涼城縣河北有般祠孟氏記云祠在河中積石爲基河水漲盛恒與水齊戴氏西征記曰今見祠在東岸臨河累石爲壁其屋宇容身而已殊似無靈不如孟氏所記將恐言之過也河水又東北逕伍子胥廟南祠在北岸頓邱郡界

臨側長河廟前有碑魏青龍三年立河水又東北為長壽津述征記曰涼城到長壽津六十里

河之故瀆出焉

禹貢雖指曰按水經東漢人所撰凡稱故瀆者皆時已無水戚城以下東光以上河水不至又無他水行其中孟康所云王莽時空者唯此耳故謂之大河故瀆其自長壽津以西至宿胥口為東漢見行之河則敘入河水東光以北至章武為清河漳水之所行則敘入清河漳水並不列大河故瀆

漢書溝洫志曰河之為中國害尤甚故導河自積石歷

龍門醜二渠以引河一則漯川今所流也一則北瀆王

莽時空故世俗名是瀆為王莽河也

清按醜史記河渠書作廝索隱曰

漢書作灑史記舊本亦作灑字從水韋昭云疏決為灑字音疏跬反顏師古音山支反然則醜字近本之誤耳漢書溝洫志注孟康曰醜分也分其流泄其怒也二渠其一出貝邱西南折者也其一則漯川也河自王莽時

遂空唯故瀆東北逕戚城西春秋哀公二年晉趙鞅率

師納衛太子蒯瞶于戚宵迷陽虎曰右河而南必至焉

今頓邱衛國縣西戚亭是也為衛之河上邑漢高帝十

二年封將軍李必為侯國矣一清按史記索隱曰戚漢志闕地道記屬東海又曰

案灌嬰傳云重泉人李必此云季必誤也然則酈注所引是漢書列傳而表亦作季必與史表同漢書百官公

卿表元狩四年戚侯李信成為太常即必曾孫又史記灌嬰傳索隱曰姚氏云按漢紀桓帝延熙二年追錄高

祖功臣李必後黃門丞李遂為晉陽關內侯則作李姓者是也又戚是衛邑東海亦有之地理志東海郡戚縣

註引鄭氏曰音憂戚故城在山東滕縣西南五十里本秦縣史記曹參嘗遷為戚令是也此戚在今開州北七

里李必封邑當在東海如小故瀆又逕繁陽縣故城東司馬說姚氏察也鄭氏德也

史記趙將廉頗伐魏取繁陽者也北逕陰安縣故城西

漢武帝元朔五年封衛不疑為侯國故瀆又東北逕樂

昌縣故城東地理志東郡之屬縣也一清按漢志東郡有樂昌縣後漢省

今本作昌樂縣誤舊唐書地理志以為晉置昌樂而晉志不載魏書地形志昌樂縣太和二十一年分魏置似

非漢縣漢宣帝封王稚君為侯國一清按褚表樂昌侯王君弟也索隱曰表在汝南按地理志汝南無樂昌徐廣曰細陽之池陽鄉也細陽汝南郡屬縣道元蓋誤證也

故瀆又東北逕平邑郭西竹書紀年晉烈公四年沈氏

作二趙城平邑五年田公子居思伐邯鄲圍平邑十年

齊田盼及邯鄲韓舉戰於平邑邯鄲之師敗逋獲韓舉

取平邑新城又東北逕元城縣故城西北而至沙邱堰

史記曰魏武侯公子元食邑於此故縣氏焉朱氏謀堦箋曰公子

元食邑於此出漢書地理志應劭注非史記也一清按

漢志常山郡元氏縣下師古又引闕駟云趙公子元之

封邑故曰元氏史記趙世家惠成王十一年城元氏洪

邁容齋隨筆疑之曰二邑命名不應相似如此竊謂闕

駟十三州志之說多本仲瑗或誤以魏為趙師古兩引之非矣郭東有五鹿墟墟之左

右多陷城公羊曰襲邑也說曰襲陷矣郡國志曰五鹿

墟故沙鹿有沙亭周穆王喪盛姬東征舍於五鹿其女

叔姪居此思哭是曰女姪之邱為沙鹿之異名也春秋

左傳僖公十四年沙鹿崩晉史卜之曰陰為陽雄上火

相乘故有沙鹿崩後六百四十五年宜有聖女與其齊

田乎後王翁孺自濟南徙元城正直其地日月當之王

氏為舜後土也漢火也王禁生政君其母夢見月入懷

年十八詔入太子宫生成帝為元后漢祚道汗四世稱制故曰火土相乘而為雄也及崩大夫揚雄作誄曰太陰之精沙鹿之靈作合于漢配元生成者也漢獻帝建安中袁紹與曹操相襲於官渡紹逼大司農鄭元載病隨軍屆此而卒郡守已下受業者衰經赴者千餘人元注五經讖緯候歷天文經通於世故范史贊曰孔書遂明漢章中輟矣一清按後漢書贊云元定義乖褒修禮合傳故章懷注云中輟謂曹褒禮不行也則漢縣北有章句無與于康成偶牽連引之實為詞句之累

沙邱堰者禹貢錐指曰水經以王莽河為禹河故以沙邱堰為禹迹推其意似謂古河本東行禹作此堰以障之使北而九河自此播焉不遵其道是為降

水唐人云河自貴鄉縣界分為九道宗此說也然禹河

不經元城此堰必非禹所作黃文叔云今澶州臨河有縣隄自黎陽入北至恩州清河歷亭皆有之然則降水者自元城以北隄塌之水是也蓋以堰為縣所作或曰元城為戰國魏地北與趙接壤賈讓云隄防之作近起戰國壅防百川各以自利齊與趙魏以河為境趙魏瀕山齊地卑下作隄遏水使西泛趙魏亦為隄以防之沙邱堰疑趙所作以障水使不得北而注于齊魏所謂以隣國為壑者也全氏曰此下有脫文當補尚書北過降水之故道也十字觀下文注云不遵其道曰降是言降水而濁漳水注中論降水曰館陶北出屯氏河其故道與是明以沙邱堰一帶為降水故竊取其義補此一句一清按全說是也寰宇記魏州大名縣下云本漢元城縣地水經注云沙邱堰在貴鄉今本無之則知此處有脫誤通典魏州治貴鄉元城二縣貴鄉有大河故瀆俗曰王莽河魏書地形志司州魏尹貴鄉縣天平二不及知元和志云後魏孝文分元城置方輿紀要云五代志前燕慕容暉置屬昌樂郡則是先曾置縣旋廢復立于天平二年地形志略前著後殆為疎矣且道元恪守班固漢志魏郡鄴縣下分註云故大河在東北故夫

河即大河故瀆今註無鄴縣是知其缺失多矣東樵不察注文縣北有沙邱堰者與下不遵其道曰降義不連屬以意測識不遵其道曰降亦曰潰堰障水也至於大

陸北播為九河

古文尚書疏證曰按水經注河水篇凡五敘至長壽津而止下便及大河故瀆

故瀆皆周漢以來之新道非禹河故道也然中有至于大陸北播于九河經文及注一段上不與元城縣沙邱

堰相次下不與沙邱堰南分屯氏河出焉相次分明經注別有及禹河故道者惜不傳耳偶聞于黃子鴻驚曰

某讀水經注三十年從未聞此論參以濁漳水條詳北過洺水是禹河自大伾以下至入海處了了然見于經

註或當日有意互見或後人任意錯簡一清按潛邱既不識縣北有沙邱堰者下有脫文又不悟此九字是注

混作經蓋水經一書從無直鈔禹貢風俗通曰河播也經文之例其得間猶未精于考核爾

昔禹治洪水播為九河自此始也禹貢兗州九河既道

謂徒駭太史馬頰覆釜胡蘇簡潔句盤鬲津也同為逆

河鄭元曰下尾合曰逆河言相承受矣蓋所潤下之勢

以通河海及齊桓霸世塞廣田居同為一河故自堰以

北館陶慶陶貝邱鬲般廣川信都東光河閒樂成以東

城地並存川瀆多亡漢世河決金隄南北離其害議者

常欲求九河故迹而穿之未知其所是以班固云自茲

距漢北亡八枝者也

禹貢錐指曰許商云徒駭在成平漳水即徒駭古之九河並東北出

至章武高城柳縣之東合為逆河入海及周定王時河徙自東光南皮浮陽絕八枝而北合徒駭漢人指此為

逆河是九河之所同故王莽改勃海郡曰迎河郡南皮縣曰迎河亭而其實非也以意度之徒駭大勢北行亦

迤東八枝太史最北宜最短向南則漸加長鬲津最南最長首受大河當在南宮縣界也要之九河所在後人

率多附會馮遂云九河既滅難明班固云自茲距漢北亡八枝酈道元云城地並存川瀆多亡斯為實錄無俟

深求

河之故瀆自沙邱堰南分屯氏河出焉

河水故瀆東北逕發于縣故城西又屈逕其城北王莽
 之所謂戢楯矣漢武帝以大將軍衛青破右賢王功封
 其子登為侯國大河故瀆又東逕貝邱縣故城南應劭
 曰左氏傳齊襄公田于貝邱是也余按京相璠杜預並
 言在博昌即司馬彪郡國志所謂貝中聚者也應注於
 此事近違矣大河故瀆又東逕甘陵縣故城南地理志
 之所謂厝也王莽改曰厝治者也漢安帝父孝德皇以
 太子被廢為王薨於此乃其葬地尊陵曰甘陵桓帝建

和元年改曰甘陵縣亦取名焉

一清按是注殊欠分曉續漢志清河國劉昭補

注云高帝置桓帝建和二年改為甘陵又云甘陵故厝
 安帝更名則是安帝更名厝縣為甘陵縣而桓帝改清
 河國為甘陵國也後漢書清河孝王慶傳亦云梁冀惡
 清河名乃改為甘陵於文當云尊陵曰甘陵縣亦取名
 焉桓帝建和二年改是周之甘泉市地也陵在瀆北邱
 清河國曰甘陵方合

墳高巨雖中經發壞猶若層陵矣世謂之唐侯冢城曰
 邑城皆非也昔南陽文叔良以建安中為甘陵丞夜宿
 水側趙人蘭襄夢求改葬叔良明循水求棺果於水側
 得棺半許落水叔良顧親舊曰若聞人傳此吾必以為
 不然遂為移殯齧而去之大河故瀆又東逕艾亭城南
 又東逕平晉城南今城中有浮圖五層上有金露盤題

云趙建武八年比釋道龍和上竺浮圖澄樹德勸化興立神廟浮圖已壞露盤尙存煒煒有光明大河故瀆又

東北逕靈縣故城南王莽之播亭也河水於縣別出為

鳴犢河大河故瀆又東逕郇縣故城東呂后四年以父

嬰功封子佗襲為侯國一清按史記惠景閒侯者年表

侯謂它襲父功為侯耳漢書高惠高后文功臣表俞王侯呂佗可知佗只單名酈注連佗襲為稱蓋其誤也

莽更名之曰善陸大河故瀆又東逕平原縣故城西而

北絕屯氏二瀆北逕繹幕縣故城東北西流逕平原鬲

縣故城西地理志曰鬲津也一清按漢志云王莽名之

曰河平亭故有窮后羿國也應劭曰鬲偃姓咎繇後氏全

曰按先贈公曰有鬲氏當是夏之同姓應氏以為偃姓恐非若以為有窮之國則竟大謬矣光武建

武十三年封建義將軍朱祐為侯國大河故瀆又北逕

修縣故城東又北逕安陵縣西本修之安陵鄉也地理

風俗記曰修縣東四十里有安陵鄉故縣也又東北至

東光縣故城西而北與漳水合禹貢錐指曰禹釀二渠

流為大河一東為漯川周定王五年河徙自宿胥口東

行漯川右逕滑臺城又東北逕黎陽縣南又東北逕涼

城縣又東北為長壽津河至此與漯別行而東北入海

水經謂之大河故瀆大河故瀆東北逕戚城西至東光

縣故城西而北與漳水合故城在今東光縣東淇水篇

云清河自東光縣西南又東北右會大河故瀆濁漳水

瀆遂空凡六百七十二歲一水分大河故瀆北出為屯氏河逕館陶

縣東東北出漢書溝洫志曰自塞宣防河復北決於館

陶縣分為屯氏河廣深與大河等成帝之世河決館陶

及東郡金隄上使河堤謁者王延世塞之三十六日河

堤成詔以建始五年為河平元年以延世為光祿大夫

是水亦斷屯氏故瀆水之又東北屯氏別河出焉屯氏

別河故瀆又東北逕信成縣張甲河出焉地理志曰張

甲河故瀆一清按漢志分註無故瀆字蓋道元所加首受屯氏別河於信成

縣者也張甲河故瀆北絕清河於廣宗縣分為二瀆左

瀆逕廣宗縣故城西又北逕建始縣故城東田融曰按全氏

五代志燕太傅長史田融著趙書云趙武帝十二年立建興郡治廣宗

置建始興德五縣隸焉左瀆又北逕經城東繚城西又

逕南宮縣西北注絳瀆右瀆又東北逕廣宗縣故城南

又東北逕界城亭北又東北逕長樂郡武彊縣故城東

長樂故信都也晉太康五年改從今名一清按長樂郡不見晉志地形

志云又東北逕廣川縣與屯氏河水故道合又東北逕

廣川縣故城西又東逕棘津亭南徐廣曰棘津在廣川

司馬彪曰縣北有棘津城呂尚賣食之困疑在此也劉

澄之云譙郡鄆縣東北有棘津亭故邑也呂尚所困處

也余按春秋左傳伐巢克棘入州來無津字杜預春秋

釋地全氏曰杭世駿曰杜預書名釋例所謂釋地特其中一種耳當作釋例子謂非也引班書者但云地理志引續書者或云郡國志莫之非也然則引釋例而但云釋地庸何傷乎又言棘亭在鄆

縣東北亦不云有津字矣而竟不知澄之於何而得是說然天下以棘為名者多未可咸謂之棘津也又春秋昭公十七年晉侯使荀吳帥師涉自棘津用牲于洛遂滅陸渾杜預釋地闕而不書服虔曰棘津猶孟津也徐廣晉紀又言石勒自葛陂寇河北襲汲人向冰於枋頭濟自棘棘津在東郡河內之間田融以為即石濟南津也雖千古茫昧理世元遠遺文逸句容或可尋沿途隱顯方土可驗司馬遷云呂望東海上人也老而無遇以

釣于周文王又云呂望行年五十賣食棘津七十則屠牛朝歌行年九十身為帝師皇甫士安云欲隱東海之濱聞文王善養老故入釣于周今汲水城亦言有呂望隱居處起自東海迄於豐雍緣其逕趣趙魏為密厝之譙

宋事為疎矣一清按名勝志引水經注云清河又東北逕棗強縣故城西又東北逕棘津津上有古臺耆舊相傳呂望賣漿臺疑是清水篇注之逸文又司馬彪郡國志云清河國屬信都棘津城劉昭補注云太公呂尚困於棘津城在琅瑯海曲非此城也瑯瑯國西海縣補注引博物記云太公望所出今有東呂鄉又釣于棘津其浦尚存西海縣即前漢之海曲縣也今莒州日照縣是是真所謂東海者矣道元以劉澄之之說為非今觀張甲故瀆又東北至修縣東會昭注較酈氏為尤密也

清河十三州志曰張甲河東北至修縣

師古曰入清漳者也屯氏別河又東枝津出焉東逕信音條

成縣故城南又東逕清陽縣故城南清河郡北魏自清

陽徙置也又東北逕陵鄉南又東北逕東武城縣故城

南又東北逕東陽縣故城南地理志曰王莽更之曰胥

陵矣俗人謂之高黎郭非也應劭曰東武城東北三十

里一作清按洪水篇注引應劭語有陵鄉故縣也又東散

絕無復津逕屯氏別河又東北逕清河郡南又東北逕

清河故城西漢高帝六年封王吸為侯國一清按史表清陽侯王吸

索隱曰漢表作清河地理志清陽清河郡之屬縣也寰

宇記云後漢甘陵國除復為縣晉省于厝城西南十七

里置清河縣魏又移清河縣并清河郡于故厝城中又

云清陽漢縣後漢并入甘陵西晉省甘陵于此置清河

郡理清陽縣復漢名今注云漢地理風俗記曰甘陵郡

封王吸為清河侯蓋用漢表東南十七里有清河故城者世謂之鵲城也一清按續漢志云甘

陵故厝鵲城即厝城之轉音師古曰厝音趨亦反又東北逕繹幕縣南分為二

瀆屯氏別河北瀆東逕繹幕縣故城南東絕大河故瀆

又東北逕平原縣枝津北出至安陵縣遂絕屯氏別河

北瀆又東北逕重平縣故城南應劭曰重合縣西南八

十里有重平鄉故縣也又東北逕重合縣故城南又東

北逕定縣故城南漢武帝元朔四年封齊孝王子劉成

為侯國一清按成史漢表皆作越史表云諡敬漢表云諡敷索隱曰說文云敷讀如躍今說文敷音芳

无切無躍音疑誤也嘗考當作敷字中山靖王地理風

子有臨樂敷侯光齊太史敷徐廣音躍可證也地理風

俗記曰饒安縣東南三十里有定鄉城故縣也屯氏別
 河北瀆又東入陽信縣今無水又東為咸河東北流逕
 陽信縣故城北地理志勃海之屬縣也東注于海屯氏
 別河南瀆自平原東絕大河故瀆又逕平原縣故城北
 東北枝津右出東北至安惠縣界東會商河屯氏別河
 南瀆又東北于平原界又有枝渠右出至安惠縣遂絕
 屯氏別河南瀆自平原城北首受大河故瀆東出亦通
 謂之篤馬河即地理志所謂平原縣有篤馬河東北入
 海行五百六十里者也東北逕安惠縣故城西又東北
 逕臨齊城南始東齊未賓大魏築城以臨之故城得其

名也又屈逕其城東故瀆廣四十步又東北逕重邱縣
 故城西春秋襄公二十五年秋同盟于重邱伐齊故也
 應劭曰安惠縣北五十里有重邱鄉故縣也又東北逕

西平昌縣故城北北海有平昌縣故加西一清按漢志有兩平昌縣

一屬平原郡一屬瑯琊郡續志北海國平昌侯國故屬瑯琊而平原郡無之平原郡九縣數之適合是省併也
晉志平原國西平縣蓋今誤本脫去昌字地形志安德州平昌縣下云二漢晉屬平原後漢晉曰西平昌是西平昌之名沿于典午漢宣帝元康元年封王長君為侯而遂波及于後漢爾
沈氏曰漢表是地節四年善國長蓋從褚表王長君名無故
 故渠川派東入般縣為

般河蓋亦九河之一道也漢書稱公孫瓚破黃巾于般

河即此瀆也一清按當作後漢書又漢志註如淳曰般如面般之般韋昭曰音逋垣反師古曰爾

雅說九河云鉤般郭璞以為水曲如鉤流般桓也然今土俗用如韋之音又東為白鹿淵水南北三百步東西千餘步深三丈餘其水冬清而夏濁渟而不流若夏水洪泛水深五丈方乃通注般瀆焉又逕般縣故城北王莽更之曰分明也東逕樂陵縣故城北地理志曰故都尉治伏琛晏謨言平原邑今分為郡又東北逕陽信縣故城南東北入海屯氏河故瀆自別河東逕甘陵之信鄉縣故城南地理志曰順帝更名安平一清按此是應劭註本云信都國明帝更名樂安安帝改曰安平國司馬彪郡國志安平國故信都延光元年改延光為安帝紀應劭曰甘陵西北十七里有信鄉故縣也屯氏故瀆又東逕甘陵縣故城北逕靈縣北

又東北逕郟縣與鳴犢河故瀆合上承大河故瀆於靈

縣南地理志曰河水自靈縣別出為鳴犢河者也東北

逕靈縣東東入郟縣而北合屯氏瀆屯氏瀆兼鳴犢之

稱也又東逕郟縣故城北東北合大河故瀆謂之靈鳴

犢口十三州志曰鳴犢河東北至脩入屯氏考瀆則不

至也一清按漢志魏郡館陶縣下云河水別出為屯氏河東北至章武入海過郡四行千五百里者也溝

洫志元帝永光五年河決清河靈鳴犢口而屯氏河遂絕蓋屯氏河漢世絕後不復流行賴有水經及酈注猶存故道而別河而南北二瀆而張甲河亦得附見否則遺迹罔知名稱莫辨如師古所云隋室分析州縣誤以為毛氏河乃置毛州之失也

又東北右過衛縣南又東北過濮陽縣北瓠子河出焉

河水東逕鐵邱南春秋左氏傳哀公二年鄭罕達帥師救衛郵無恤御簡子衛太子為右登鐵上望見鄭師衛太子自投車下即此處也京相璠曰鐵邱名也杜預曰在戚南河之北岸有聶城城戚邑也東城有子路冢河之西岸有竿城郡國志曰衛縣有竿城者也河南有龍淵宮武帝元光中河決濮陽汜郡十六發卒十萬人塞決河起龍淵宮蓋武帝起宮於決河之傍龍淵之側故曰龍淵宮也河水東北流而逕濮陽縣北為濮陽津故城在南與衛縣分水城北十里有瓠河口有金隄宣房堰粵在漢世河決金隄涿郡王尊自益州刺史遷東郡

太守

一清按漢書尊自徐州刺史遷東郡太守非益州也

河水盛溢泛浸瓠子金

堤決壞尊躬率民吏投沈白馬祈水神河伯親執圭璧請身填隄廬居其上吏民皆走尊立不動而水波齊足而止公私壯其勇節河水又東北逕衛國縣南東為郭

口津

黃氏曰郭口一作國口全氏曰亦作谷口方輿紀要晉太元十年秦苻丕與晉將檀元戰于谷口胡

三省註谷口在枋頭西即此處也漢志河內郡隆慮縣國水東至信成入張甲河過郡三行一千八百四十里凡漢志之水大較皆見于水經注獨國水不著蛛絲馬跡蓋賴此文胡東譙求其詳而不得竟以淇水當之非也漢志淇出共而國出隆慮淇入大河而國入張甲河源流判然水經以淇出隆慮隆慮與共本屬接壤或是水源之互見然未可遂以國水當之也東京以後張甲之瀆已枯而國水無所考見道元亦遂失之使國水即安得至此又以國口名其津哉

河水又東逕鄆城縣

北故城在河南一十八里王莽之鄆良也沈州舊治魏武創業始自於此河上之邑最為峻固晉八王故事曰東海王越治鄆城城無故自壞七十餘丈越惡之移治濮陽城南有魏使持節征西將軍太尉方城侯鄧艾廟廟南有艾碑秦建元十二年廣武將軍沈州刺史關內侯安定彭超立河之南岸有新城宋寧朔將軍王元謨前鋒入河所築也北岸有新臺鴻基層廣高數丈衛宣公所築新臺矣詩齊姜所賦也為盧關津臺東有小城崎嶇頽側臺址枕河俗謂之底閣城疑故關津都尉治也所未詳矣河水又東北逕范縣之秦亭西春秋經書

築臺于秦者也河水又東北逕委粟津大河之北即東武陽縣也

左會浮水故瀆

故瀆上承大河於頓邱縣而北出東逕繁陽縣故城南應劭曰縣在繁水之陽張晏曰縣有繁淵一清按漢志註張晏曰其

界為繁淵春秋襄公二十年經書公與晉侯齊侯盟于澶淵

杜預曰在頓邱縣南今名繁淵一清按春秋有兩澶淵襄二十一年盟于澶淵杜

預曰澶淵在頓邱縣南今名繁汙此衛地又近戚田二十六年傳云會于澶淵以討衛疆戚田此衛之澶淵也三十年會于澶淵宋災故許慎說文澶淵水在宋是為宋地司馬彪郡國志沛國杼秋故屬梁有澶淵聚則非此繁澶淵即繁淵也亦謂之浮水焉昔魏徙大梁趙以

中牟易魏故志曰趙南至浮水繁陽即是瀆也一清按書敘指南曰水經澶州地名曰龍

鹿之野晉文公受塊於野人即此處矣京相璠曰今衛南曰水經澶州地名曰龍故瀆東絕大河故瀆東逕五

縣西北三十里有五鹿城今屬頓邱縣一清按杜預曰

一在元城東一在衛縣西北寰宇記云元城東為五鹿衛地有二五鹿

鹿墟即重耳乞食處此為五鹿城道元合而一之

水故瀆又東南逕衛國邑城北故衛公國也漢光武以

封周後也又東逕衛國縣故城南古斟觀應劭曰夏有

觀扈即此城也一清按所謂觀扈是五觀漢志之畔觀與有扈同或曰即太康姦子五人王應

麟曰五子述大禹之戒以作歌豈朱均管蔡比水經本

韋氏之說非也全氏曰夏時有斟灌無斟觀得無以畔

字之形近斟而誤乎竹書紀年梁惠成王二年齊田壽率師伐我

圍觀觀降浮水故瀆又東逕河牧城而東北出郡國志

曰衛本觀故國姚姓有河牧城又東北入東武陽縣東

入河

又有漂水出焉

戴延之謂之武水也一清按困學紀聞曰太史公班孟堅謂禹灑二渠以引其河一具邱

一漂川李垂導河書曰東為漂川者乃今泉源赤河北

出貝邱者乃今王莽故瀆而漢塞宣房所行二渠蓋獨

漂川其一則漢決之起觀城入蒲臺所謂武地理志曰

河也武河以漢武帝導河北流而得其名

漂水出東武陽縣一清按地理志東郡東武陽縣下云禹治漂水無出字漂始黎陽宿胥口

不僅出此也應劭於平原郡漂陰縣注云出東武陽蓋誤以應說為班志也續志亦云東武陽濕水出皆與

城東曹操為東郡所治也引水自東門石竇北注于堂池池南故基尚存中城內又立一石臺甚大城西門名冰井門門內曲中冰井猶存門外有故臺號武陽臺匝臺亦有隅雉遺迹河水又東逕武陽縣東范縣西而東北流也

一清按禹貢錐指曰河自此與漯別東北逕東阿在平等縣至千乘入海此自西漢末以迄後魏漯川之源委宋世河決商胡朝城流絕而舊迹之存者鮮矣

又東北過東阿縣北

河水於范縣東北流為倉亭津述征記曰倉亭津在范縣界去東阿六十里魏土地記曰津在武陽縣東北七十里津河濟名也河水又東歷柯澤春秋左傳襄公十四

年衛孫文子敗公徒於柯澤者也逕東阿縣故城西而東北出流注河水枝津東出謂之鄧里渠也

又東北過荏平縣西

河水自鄧里渠東北逕昌鄉亭北逕礪礪城西述征記曰礪礪津名也自黃河泛舟而渡者皆為津也其城臨水西南崩于河宋元嘉七年到彥之北入拔之後失至二十七年以王元謨為寧朔將軍前鋒入河平礪礪守之都督劉義恭以沙城不堪守召元謨令毀城而還後更城之魏立濟州治此也

朱氏謀埠箋曰玉海引此河作魏置鎮守名濟州關

水衝其西南隅又崩于河即故荏平縣也應劭曰荏山

名也縣在山之平陸故曰荏平也王莽之功崇矣經曰

大河在其西鄧里渠歷其東

全氏曰此蓋約舉
瓠子河篇經文

即斯邑

也昔石勒之隸師權屯耕於荏平聞鼓角鞞鐸之聲於

是縣也西與聊城分河河水又與鄧里渠合水上承大

河於東阿縣西東逕東阿縣故城北故衛邑也應仲瑗

曰有西故稱東魏封曹植為侯國

朱氏謀埠箋曰按魏
志曹植自雍邱徙封

東阿非
侯國也

大城北門內西側阜上有大井其巨若輪深六

七丈歲嘗煮膠以貢天府本草所謂阿膠也故世俗有

阿井之名縣出佳繒縑故史記云秦昭王服太阿之劍

阿縞之衣也又東北逕臨邑縣與將渠合又北逕荏平

縣東臨邑縣故城西北流入於河河水又東北流逕四

瀆津津西側岸臨河有四瀆祠東對四瀆口河水東分

洑亦曰洑水受河也然滎口水斷石門不通始自是出

東北流逕九里與清水合故洑瀆也自河入洑自洑入

淮自淮達江水徑周通故有四瀆之名也昔趙

一清按
史記孔

子世家及家語趙下當
有鞅字或簡子二字

殺鳴犢仲尼臨河而歎自是而

返曰丘之不濟命也夫琴操以為孔子臨狄水而歌云

狄水衍兮風揚波舟楫顛倒更相加余按臨濟故狄也

是濟所逕得其通稱

于氏欽齊乘曰朱子韓文考異曰
水經河水至東阿荏平等縣東北

流四瀆津津灌注之河水東分濟水受河蓋滎口水斷石
門不通始自是出與清水合昔趙殺鳴犢孔子臨河而

嘆作歌曰狄之水兮風揚波舟楫顛倒更相加歸來胡為期臨濟故狄也是濟所經得其通稱詳此則是濟水自滎澤之下潛流至此四瀆津口而復出河又東分一支與之合流以過臨濟而為狄水然此皆齊地在今濟鄆之間史記以為孔子自衛將西見趙簡子則其道不當出此又不可曉者今姑闕之以俟深于地理者考焉按漢陳留郡平邱縣有臨濟亭故狄也蓋濟水出陶邱北南被孟豬北瀆注巨野亭臨此瀆故曰臨濟春秋時狄人據此因以名焉此水夫子所歌至王莽時枯竭水經所謂濟枯渠注巨野者也其自巨野至四瀆津與河合流者乃齊之清河水經所謂得其通稱者是也漢千乘郡別有狄縣安帝更名臨濟唐又別以漢東朝陽縣為臨濟今章邱之臨濟鎮也文公蓋疑于此云 河水又逕楊虛縣之故城東俗猶謂是城曰陽城矣河水又逕在平城東城內有故臺世謂之時平城非也蓋在時音相近耳

又東北過高唐縣東

河水於縣漯水注之水自城東北逕東武陽縣故城南

一清按此句文義難解蓋高唐漯水與東武陽漯水相承而有別禹貢錐指曰漢志東郡東武陽縣下云禹治漯水東北至千乘入海又平原郡高唐縣下云桑欽言入海而漯首受河自黎陽宿胥口始不起東武陽也自周定王五年河徙從宿胥口東行漯川至長壽津始與漯別其津以西漯水之故道悉為河所占而上游較短然河之故瀆不經東武陽亦不經高唐迨漢成帝建始末河決館陶由東武陽絕漯水而東北至高唐又絕漯水東北至千乘入海雖嘗塞治而故道猶存王莽始建國三年復決於此莽為元城冢墓計不堤塞明帝永平中之故道又為河所占上游益短矣漯水一出於東武陽再出于高唐據成帝以後言之觀此益知高唐在東武陽之東北漯水既至高唐不得復經東武陽抑或城應東北上脫去涼字蓋河漯分流自涼城長壽津始也 應劭曰縣在武水之陽王莽之武昌也然則漯水亦或武

水矣臧洪為東郡太守治此曹操圍張超於雍邱洪以情義請袁紹救之不許洪與紹絕紹圍洪城中無食洪呼吏士曰洪於大義不得不死諸君無事空受此禍眾泣曰何忍捨明府也男女八千餘人相枕而死洪不屈紹殺洪邑人陳容為丞謂曰寧與臧洪同日死不與將軍同日生紹又殺之士為傷歎今城四周紹圍郭猶存水匝隍壑於城東北合為一瀆東北出郭逕陽平縣之岡成城西郡國志曰陽平縣有岡成亭又逕陽平縣故城東漢昭帝元平元年封丞相蔡義為侯國漯水又北絕莘道城之西北有莘亭春秋桓公十六年衛宣公使

伋使諸齊令盜待于莘伋壽繼殞于此亭京相璠曰今平原陽平縣北一十里有故莘亭道阨限蹊要自衛適齊之道也望新臺於河上感二子於宿齡詩人乘舟誠可悲矣今縣東有二子廟猶謂之孝祠矣漯水又東北逕樂平縣故城東縣故清也漢高帝八年封空中於清

沈氏曰漢表作室中同徐廣云一作室中索隱曰空中姓也史表作空中脫同字 宣帝封許廣漢

少弟翁孫于樂平 沈氏曰褚表作樂平班表作樂成屬平氏與褚表異然則非平原之清也

一清按此是褚表之謬而道元誤承之者漢表樂成侯許延壽翁孫延壽字也褚少孫以為樂平樂平是霍山

封邑非翁孫也詳具漳水篇吾于此更有一疑地理志東郡清縣師古註引應劭曰章帝更名樂平夫樂平既

始自章帝則何以宣帝時封邑即有此稱且班固于外戚恩澤侯霍山封邑明註云東郡則又非他處可知此

皆事之不可以臆測者至清並為侯國王莽之清治矣
本屬東郡沈氏云平原誤也

漢章帝建初中更從今名也**漯水**又北逕聊城縣故城

西城內有金城周匝有水南門有馳道絕水南出自外

泛舟而行矣東門側有層臺秀出雲表魯仲連所謂還

高唐之兵卻聊城之衆者也
一清按寰宇記博州聊城縣下云石柱後魏孝文所

立為鄴東之表水經曰武水東流從石柱北是也今本無之蓋缺失矣**漯水**又東北逕清

河縣故城北地理風俗記曰甘陵故清河清河在南一

十七里今於甘陵縣故城東南無城以擬之直東二十

里有艾亭城東南四十里有此城疑即清河城也後蠻

居之故世稱蠻城也**漯水**又東北逕文鄉城東南又東

北逕博平縣故城南有層臺秀上王莽改之曰加睦也

右與黃溝同注川澤黃溝承聊城郭水水泛則津注水

耗則輟流自城東北出逕清河城南又東北逕攝城北

春秋所謂聊攝以東也俗稱郭城非也城東西三里南

北二里東西隅有金城城卑下墟郭尚存左右多墳壠

京相璠曰聊城縣東北三十里有故攝城今此城西去

聊城二十五六里許即攝城者也又東逕文鄉城北又

東南逕王城北魏太常七年安平王鎮平原所築世謂

之王城太和二十三年罷鎮立平原郡治此城也
全氏曰按

魏書地形志所謂太平鎮者也但据志則以太和十一年分屬濟州非二十三年置也蓋罷鎮在是年而平原

之為郡固久矣黃溝又東北迤左與漯水隱覆勢鎮河陸東出於高唐縣大河右迤東注漯水矣地理志桑欽曰漯水出高唐余按竹書穆天子傳稱丁卯天子自五鹿東征釣於漯水以祭淑人是日祭邱己巳天子東征食馬於漯水之上尋其浴歷逕趣不得近出高唐也桑氏所言蓋津流出次于所聞也俗以是水上承於河亦謂之源河矣禹貢錐指曰源河乃漯之再出者桑欽惟知出此而不知起東武陽則踈矣河既與漯合復分為二漯由漯陰縣故城北河由平原縣故城東蓋自高唐以西至武陽河在南而漯在北自高唐以東至海則漯在南而河在北矣今禹城縣南有源陽故城唐縣在源河之北故名一清按上條經云又有漯水出焉酈以東武陽隸之而漢志則引桑欽之語以為漯出高唐後人猶指水經為桑欽作豈其然乎漯水又東北

逕援

一清按漢志作瑗

縣故城西王莽之東順亭也杜預釋地

日濟南祝阿縣西北有援城漯水又逕高唐縣故城東

昔齊威王使盼子守高唐趙人不敢漁于河即魯仲連

子謂田巴曰今楚軍南陽趙伐高唐者也春秋左傳哀

公十年趙鞅帥師伐齊取黎及轅毀高唐之郭杜預曰

轅即援也祝阿縣西北有高唐城漯水又東北逕漯陰

縣故城北縣故黎邑也

一清按春秋傳註作犁邱

漢武帝元光三年

封匈奴降王昆邪為侯國王莽更名翼成歷北漯陰城

南伏琛謂之漯陽城

一清按是注可與下經注相參證

南有魏沈州刺

史劉岱碑地理風俗記曰平原漯陰縣今巨漯亭是也

漯水又東北逕著縣故城南

一清按漢志濟南郡著縣師古曰音竹庶反又音直

庶反而韋昭誤以為著龜之著字乃音紀谷反失之遠矣

又東北逕崔氏城北春秋

左傳襄公二十七年崔成請老于崔者也杜預釋地曰

濟南東朝陽縣西北有崔氏城漯水東北逕東朝陽縣

故城南漢高帝六年

沈氏曰本表是七年

封都尉華寄為侯國地

理風俗記曰南陽有朝陽縣故加東地理志曰王莽之

修治也

一清按漢志濟南郡朝陽縣應劭曰在朝水之陽至續志始加東字後漢書耿弇傳云從朝陽

橋濟河以渡章懷註曰朝陽縣名屬濟南郡在朝水之陽城在濟水北有漯河在今濟州臨濟縣東亦見濟水

篇注 漯水又東逕漢徵君伏生墓南碑碣尚存以明經為

秦博士秦坑儒士伏生隱焉漢興教于齊魯之間撰五

經尚書大傳文帝安車徵之年老不行乃使掌故歐陽

生等受尚書於徵君號曰伏生者也漯水又東逕鄒平

縣故城北古鄒侯國舜後姚姓也又東北逕東鄒城北

地理志曰千乘郡有東鄒縣漯水又東北逕建信縣故

城北漢高帝七年封婁敬為侯國應劭曰臨沛縣西北

五十里有建信侯城都尉治故城者也

全氏曰婁敬以關內侯號建信

耳是虛名非封國也故史漢表中俱不列敬封爵而地志亦不稱建信縣為侯國然應劭載有建信侯城之名

則又何居考漢家關內侯之制不得稱國而未嘗不有食邑蓋敬所食邑在建信故以名其城焉 漯水

又東北逕千乘縣二城間漢高帝六年以為千乘郡王

莽之建信也章帝建初四年為王國和帝永元七年改

為樂安郡故齊地伏琛曰千乘城在齊城西北一百五十里隔會水即漯水之別名也又東北為馬常坑按馬

常坑即馬車瀆見淄水注坑東西八十里南北三十里亂河枝流而

入于海河海之饒茲焉為最地理風俗記曰漯水東北

至千乘入海河盛則通津委海水耗則微涓絕流書浮

于濟漯亦是水者也禹貢雖指曰此自西漢末以迄後魏漯川之源委也

又東北過楊虛縣東商河出焉

地理志曰楊虛平原之隸縣也一清按漢志平原郡有樓虛無楊虛齊氏曰樓

乃楊之譌當以水經注正之然功臣表元帝封樓虛侯訾順而范史馬武亦封楊虛侯續志無樓虛并無楊虛似是明章以後所省樓虛楊虛二名並見漢封抑或原是楊虛後改樓虛東京始建旋復故稱迨乎廢并杏爾

無聞如以為漢景帝四年以封齊悼惠王子將廬為侯

國也一清按景帝史漢表皆作文帝城在高唐城之西

南經次于此是不比也商河首受河水亦漯水及澤水

所潭也淵而不流世謂之清水自此雖沙漲填塞厥迹

尚存歷澤而北俗謂之落里坑逕張公城西又北重源

潛發亦曰小漳河商漳聲相近故字與讀移耳一清按元和郡

縣志云漢鴻嘉四年河水泛溢河隄都尉許商鑿此河通海故以商為名禹貢雖指曰商河行大河之南漯水之北改次于四瀆津之下高唐漯水之上緣道元有不比之糾也商河又北逕平原縣

東又逕安惠縣故城南又東北逕平昌縣故城南又東

逕般縣故城南又東逕樂陵縣故城南漢宣帝地節四

年封侍中史子長為侯國

全氏曰按褚表史子長名高

商河又東逕

枋鄉縣故城南高后八年封齊悼惠王子劉辟光為侯

國也

沈氏曰按本表是文帝四年封

王莽更之曰張鄉也應劭曰般縣

東南六十里有枋鄉城故縣也沙溝水注之水南出大

河之陽泉源之不合河者二百步其水北流注商河南

河又東北流逕馬嶺城西北南流屈而東注南轉逕城

東城在河曲之中東海王越斬汲桑於是城

全氏曰此語出晉書

然其實是并州乞活之田甄田蘭所斬非越也

商河又東北逕富平縣故城北

地理志曰侯國也王莽曰樂安亭應劭曰明帝更名厭

次闕駟曰厭次縣本富平侯車騎將軍張安世之封邑

非也按漢書昭帝元鳳六年封右將軍張安世為富平

侯薨子延壽嗣國在陳畱別邑在魏郡陳畱風俗傳曰

陳畱尉氏縣安陵鄉故富平縣也是乃安世所食矣歲

入租千餘萬延壽自以身無功德何堪久居先人大國

上書請減戶天子以為有讓徙封平原并食一邑戶口

如故而稅減半十三州志曰明帝永平五年改曰厭次

矣按史記高祖功臣侯者年表高帝六年封元頃為侯

國徐廣音義曰漢書作爰類

全氏曰十字注中注

是知厭次舊名

非始明帝蓋復故耳

一清按小司馬云漢志闕蓋疎忽之甚耳

縣西有東方

朔冢冢側有祠祠有神驗水側有雲城漢武帝元封四

年封齊孝王子劉信為侯國也一清按索隱曰志屬瑯琊又史表是元狩漢表

是元朔商河又分為二水南水謂之長藜溝東流傾注於

海一清按郡國志平原郡鬲縣劉昭補註引魏都賦曰縣有蓋節淵疑即長藜溝溝南海側有

蒲臺臺高八丈方二百步三齊略記曰鬲城東南有蒲

臺秦始皇東遊海上於臺下蟠蒲繫馬至今每歲蒲生

縈委若有繫狀似水楊可以為箭今東去海三十里北

水世又謂之百薄瀆東北流注于海水矣一清按全氏校本於此注

下增又東北過高唐縣東經文一條予謂非也上文注云城在高唐城之西南經次于此是不比也則經文楊

虛宜在高唐之前矣而下文大河又東北逕高唐縣故城西當直接前漯水入海之下緣經之誤文義遂乖隔

爾大河又東北逕高唐縣故城西春秋左傳襄公十九

年齊靈公廢太子光而立公子牙以夙沙衛為少傅齊

侯卒崔杼逆光光立殺公子牙於句瀆之邱衛奔高唐

以叛京相璠曰本平原縣也齊之西鄙也大河逕其西

而不出其東經言出東誤耳大河又北逕張公城臨側

河湄魏青州刺史張一清按張下失其名魏青州後魏

治梁鄒領平原鬲臨濟在平廣宗高唐六縣屬齊州不屬青州隋書地理志平原郡平原縣下云後魏置東青

州未久而廢史記正義曰德州平原縣南六十里有張公故城水東有津焉俗名張公津恐此平原郡古津也

魏書張夔傳曾祖幸位青州刺史祖準之又為東青州刺史東青州暫置旋廢未必更有一張姓者莅其土或

即是夔之祖未可知也治此故世謂之張公城水有津

以夔貴重故稱張公云焉名之曰張公渡河水又北逕平原縣故城東地理風

俗記曰原博平也故曰平原矣縣故平原郡治矣漢高
 帝六年置王莽改曰河平也晉灼曰齊西有平原河水
 東北過高唐高唐即平原也故經言河水逕高唐縣東
 非也按地理志曰高唐漯水所出平原則篤馬河導焉
 明平原非高唐大河不得出其東審矣大河右溢世謂
 之甘棗溝水側多棗故俗取名焉河盛則委泛水耗則
 輟流故瀆又東北歷長隄逕漯陰縣北東逕著城北東
 為陂淀淵潭相接世謂之穢野薄河水又東北逕陽阿
 縣故城西漢高帝六年封郎中萬訢為侯國應劭曰漯
 陰縣東南五十里有陽阿鄉故縣也

一清按漢志上黨郡有陽阿縣非河

水逕流之地平原郡有阿陽縣與漯陰縣相近萬訢史
 漢表皆無其姓名表有陽河齊侯其石索隱曰縣名屬
 上黨是知河字誤也當作陽阿陽阿與阿陽其文互易
 因致混淆漢書孝成皇后傳云屬陽阿主家師古曰陽
 阿平原之縣也今俗書阿字為河字又或為河陽皆後
 人所妄改耳方輿紀要濟南府臨邑下云著城在縣東
 南五十里秦縣漢書灌嬰收著漯陰平原鬲盧此即著
 也漯陰城在縣西十里本齊之犁邱邑阿陽城在縣南
 漢縣屬平原郡後漢省太平寰宇記云阿陽城在禹城
 縣南七十里漢魏以下却改為陽阿然則阿陽之在平
 原審矣酈氏既誤記陽阿為訢封邑而沁水篇注陽阿
 縣下又引卞訢為證一事兩隸書成一手隔越不過數
 卷猶有斯繆信乎撰述之難也已又按訢封邑宜為阿
 陽非上黨之陽阿陽阿齊侯其石封邑也然訢名不見
 于史漢表則以世本漢書多脫失是以班固云高祖百
 四十七人今實數之得百三十三人耳訢亦在失亡之
 中矣不然道元既記于此而又筆之沁水篇豈真鑿孔
 造作耶但此篇作萬訢沁水篇又作卞訢萬古省作万
 與卞字相似不妨
 兩存其疑義耳

又東北過漯陽縣北

河水自平原左逕安惠城東而北為鹿角津東北逕般

縣樂陵枋鄉厭次縣故城南為厭次河漢安帝永初二

年劇賊畢豪等數百乘船寇平原縣令劉雄門下小吏

所輔浮舟追至厭次津與賊合戰並為賊擒輔求代雄

豪縱雄於此津輔一清按輔下有脫文范史劉茂傳豪

應沒其可謂孝盡愛敬義極君臣矣河水右逕漯陰縣

故城北王莽之臣武縣也一清按此北漯陰也伏琛之

脫去漯陽縣故并王莽所改臣武之名亦失之又臣武

孫潛夫校本作巨武巨字是也前北漯陰注引地理風

俗記云今巨漯亭漯水即河水又東北為漯沃津在漯

沃縣故城南王莽之延亭者也地理風俗記曰千乘縣

西北五十里有大河河北有漯沃城故縣也魏改為後

部亭今俗遂名之曰右輔城河水又東逕千乘縣故城

北伏琛之所謂千乘北城者也

又東北過利縣北一清按漢志齊郡利縣又東北過甲下

邑濟水從西來注之又東北入于海

河水又東分為二水枝津東逕甲下城南東南歷馬常

坑注濟經言濟水注河非也河水自枝津東北流逕甲

下邑北世謂之倉子城又東北流入于海淮南子曰九

折注於海而流不絕者崑崙之輸也尚書禹貢曰夾右

碣石入于河山海經曰碣石之山繩水出焉東流注於

河河之入海舊在碣石今川流所導非禹瀆也周定王

五年河徙故瀆故班固曰商竭周移也又以漢武帝元

光二年河徙東郡更注勃海是以漢司空掾王璜按漢

書儒林傳琅邪王橫平仲傳言曰往者天嘗連雨東北

風海水溢西南出瀆數百里故張君云禹貢錐指曰後

義並引張氏地理志張氏不知其名豈即所稱張君耶

程大昌以為張揖按隋書經籍志有魏博士張揖撰廣

雅二卷而無張氏地理志未審張君是揖否碣石在海中蓋淪于海水也

錐指曰按道元卒于魏孝昌二年歲在丙午下距齊文

宣登碣石之歲天保四年癸酉凡二十八年而文宣所

登乃在營州前此未聞營州有碣石疑是時平州之碣

石已亡故假營州臨海之一山登之以修故事不然豈

有舍此登彼之理自是以後登碣石者無聞焉妄意推

測碣石之亡當在魏齊之世丙午至癸酉二十八年間

也昔燕齊遼曠分置營州今城屆海濱海水北侵城垂

淪者半王璜之言信而有徵碣石入海非無證矣禹貢

錐指曰薛氏曰河入海處舊在平州石城縣東望碣石其後

大風逆河皆漸于海舊道堙矣又曰王橫曰往者天嘗

連雨東北風海水溢西南出瀆數百里九河之地已為

海所漸矣九河但堙塞耳而橫云為海所漸世莫不痛

詆之百詩獨為余言曰九河若作逆河則未為不是余

領之而未有以見其誠然及讀薛氏語始知古人先得

槩從刪削卓見特識得東樵為之闡明善哉言乎薛氏
名季宣字士龍永嘉人宋史儒林傳焦氏經籍志書古
文訓十六卷
薛季宣撰著

水經注釋卷五終

水經注釋卷六

仁和趙一清誠夫錄

汾水

澮水

涑水

文水

原公水

洞渦水

晉水

湛水

汾水出太原汾陽縣北管涔山

山海經曰北次二經之首在河之東其東首枕汾其名

曰管涔之山其上無木而多草其下多玉汾水出焉而

西流注于河十三州志曰出武州之燕京山亦管涔之

異名也其山重阜修巖有草無木泉源導於南麓之下

蓋稚水蒙流耳又西南夾岸連山聯峯接勢劉淵族子

曜嘗隱居於管涔之山夜中忽有二童子入跪曰管涔王使小臣奉謁趙皇帝獻劍一口置前再拜而去以燭視之劍長二尺光澤非常背有銘曰神劍服御除衆毒曜遂服之劍隨時變為五色也後曜遂為胡王矣汾水又南與東西溫谿合水出左右近谿聲流翼注水上雜樹交蔭雲垂烟接自是水流潭漲波襄轉泛又南逕一城東憑墉積石側枕汾水俗謂之代城又南出二城間其城角倚翼枕汾流世謂之侯莫干城蓋語出戎方傳呼失實也汾水又南逕汾陽縣故城東川土寬平峘山夷水故地理志曰汾水出汾陽縣北山西南流者也漢

高帝十一年封斬彊為侯國後立屯農積粟在斯謂之羊腸倉山有羊腸坂在晉陽西北石磴縈委若羊腸焉故倉坂取名矣漢永平中治呼沱石臼河按司馬彪後

漢郡國志常山南行唐縣有石臼谷一清按十九字注中注寰宇記平山

縣下云隋圖經房山澱水出焉亦謂之石臼河又謂之行唐水出行唐東入博陵謂之木刀溝一謂之袞袞水南流入滹沱澱水一見于清水篇曰澱邑是也再見于濁漳水篇曰澱口是也皆是水流逕通者也蓋咨

乘朱氏謀瑋箋曰呼沱之水轉山東之漕自都盧至羊御覽作資承

腸倉將憑汾水以漕太原一清按古今注曰永平十年作常山呼沱河蒲吾渠通漕

船也此即所謂轉山東漕之道也用實秦晉苦役連年轉運所經凡三

百八十九隘死者無算拜鄧訓為謁者監護水功訓隱

括知其難立具言肅宗肅宗從之全活數千人和熹鄧后之立叔父陔以為訓積善所致也羊腸即此倉也又南逕秀容城東魏土地記曰秀容胡人徙居之立秀容護軍治東去汾水六十里南與酸水合水源西出少陽之山東南流注于汾水汾水又南出山東南流洛陰水注之水出新興郡西流逕洛陰城北又西逕孟縣故城南春秋左傳昭公二十八年分邾氏七縣為大夫之邑以孟丙為孟大夫顧炎武左傳杜解補正云孟丙為孟大夫今本作孟丙者非漢書地理志云孟晉大夫孟丙邑以其為孟大夫而謂之孟丙猶魏大夫之為魏壽餘閻大夫之為閻嘉邠鄆大夫之為鄆也鄆午洛陰水又西逕狼孟縣故城南王莽之狼調也左

右夾澗幽深南面大壑俗謂之狼馬澗舊斷澗為城有南北門門闔故壁尚在洛陰水又西南逕陽曲城北魏土地記曰陽曲胡寄居太原界置陽曲護軍治其水西南流注于汾水汾水又南逕陽曲城西南注也一清按漢志太原郡陽曲縣應劭曰河千里一曲當其陽故曰陽曲也東南過晉陽縣東晉水從縣東南流注之

太原郡治晉陽城秦昭襄王三年立尚書所謂既修太原者也春秋說題辭曰高平曰太原原端也平而有度廣疋曰大鹵太原也釋名曰地不生物曰鹵盧穀梁傳曰中國曰太原夷狄曰大鹵尚書大傳曰東原底平大

而高平者謂之太原郡取稱焉魏土地記曰城東有汾水南流水東有晉使持節都督并州諸軍事鎮北將軍太原成王之碑水上舊有梁清泝殞於梁下豫讓死於津側亦襄子解衣之所在也汾水西逕晉陽城南舊有介子推祠祠前有碑廟宇傾頽唯單碑獨存矣今文字剝落無可尋也

又南洞渦水從東來注之

汾水又南逕梗陽縣故城東故榆次之梗陽鄉也魏獻子以邑大夫魏戊也京相璠曰梗陽晉邑也今太原晉陽縣南六十里榆次界有梗陽城名勝志清源縣下引水經注云汾水又南

逕梗陽縣故城東有白石水中隱水俱來注之今本無之汾水又南即洞渦水會者也

又南過大陵縣東

昔趙武靈王遊大陵夢處女鼓琴而歌想見其人吳廣進孟姚焉即于此縣也王莽改曰大寧矣汾水於縣左迤為鄔澤廣雅曰水自汾出為汾陂其陂東西四里南北一十餘里陂南接鄔地理志曰九澤在北并州藪也呂氏春秋謂之大陸又名之曰漚洩之澤俗謂之鄔城泊許慎說文曰馮水出西河中陽縣北沙南入河即此

水也禹貢錐指曰冀州有三大陸一在鉅鹿郡北班固繫諸禹貢又名鉅鹿澤呂氏春秋云趙有鉅鹿又

名廣河澤爾雅晉有大鹿孫炎曰今鉅鹿縣廣河澤是也此真禹貢之大陸也一在河內修武縣左傳定公元年魏獻子田于大陸還卒于甯杜預云大陸疑卽吳澤陂近甯是也一在太原鄆縣班固云九澤在縣北是爲昭餘祁并州藪鄆道元云呂氏春秋謂之大陸是也斯二者皆非禹貢之大陸也今按呂覽九藪旣云晉之大陸又云趙之鉅鹿則一澤不應兩見故道元以鄆澤當之蓋晉爲唐叔始封大陸宜在其境內而鉅鹿當戰國時實爲趙地故分爲二澤也要之廣平曰陸是處有之其大者則謂之大陸猶之高平曰原亦是處有之其大者則謂之太原耳然晉之大陸在漢大陵縣界陸恐陵之誤全氏曰昭餘祁是鄆水譌而爲馮水馮烏字之變也是爲并州藪若并州之川曰漚夷則漚也呂覽以二者合而爲一善長于漚水明指爲漚夷矣而鄆水又溷引之蓋馮水又會嬰侯之水山海經稱謁戾之山嬰侯失檢也

之水出于其陰北流注於汜水右出汜山其水殊源共合注于嬰侯之水亂流逕中都縣南俗又謂之中都水

侯甲水注之水發源祁縣胡甲山有長坂謂之胡甲嶺

卽劉歆遂初賦所謂越侯甲而長驅者也蔡邕曰侯甲

亦邑名也在祁縣侯甲水又西北歷宜歲郊逕太谷謂

之太谷水出谷西北流逕祁縣故城南自縣連延西接

鄆澤是爲祁藪也卽爾雅所謂昭餘祁矣賈辛邑也辛

貌醜妻不爲言與之如臯射雉雙中之則笑也朱氏謀

據左傳貌醜者自是王莽之示縣也又西逕京陵縣故

城北王莽更名曰致城矣於春秋爲九原之地也故國

語曰趙文子與叔向遊于九原曰死者若可作也吾誰

與歸叔向日其陽子乎文子曰夫陽子行廉直於晉國

不免其身智不足稱吾其隨會乎納諫不忘其師矣其

京尚存漢興增陵於其下故曰京陵焉方輿紀要平陶城後魏改曰平

遙避太武嫌名水經注西胡侯甲水又西北逕中都縣內侵徙居京陵今本無之

故城南城臨際水湄春秋昭公二年晉侯執陳無宇於

中都者也漢文帝為代王都此武帝元封四年上幸中

都宮殿上見光赦中都死罪以下侯甲水又西合於嬰

侯之水逕鄆縣故城南晉大夫司馬彌牟之邑也謂之

鄆水也俗亦曰慮水慮鄆聲相近故因變焉又西北入

鄆陂而歸于汾流矣

又南過平陶縣東文水從西來流注之

汾水又南與石桐水合即縣水也水出界休縣之縣山

北流逕石桐寺西即介子推之祠也昔子推逃晉文公

之賞而隱於縣上之山也晉文公求之不得乃封縣為

介子推田曰以志吾過且旌善人因名斯山為介山故

袁山松郡國志曰界休縣有介山有縣上聚子推廟王

肅喪服要記曰昔魯哀公祖載其父孔子曰寧設桂樹

乎哀公曰不也桂樹者起於介子推子推晉之人也文

公有內難出國之狄子推隨其行割肉以續軍糧後文

公復國忽忘子推子推奉唱而歌文公始悟當受爵祿

子推奔介山抱木而燒死國人葬之恐其神魂實于地

故作桂樹焉吾父生於宮殿死於枕席何用桂樹為余
 按夫子尚非璵璠送葬安能問桂樹為禮乎王肅此證
 近於誣矣石桐水又西流注於汾水汾水又西南逕界
 休縣故城西王莽更名之曰界美矣城東有徵士郭林
 宗宋子浚二碑宋冲以有道司徒徵林宗縣人也辟司
 徒舉太尉以疾辭其碑文云將蹈洪崖之遐迹紹巢由
 之逸軌翔區外以舒翼超天路以高峙稟命不融享年
 四十有三建寧四年正月丁亥一清按漢隸字源載此碑作乙亥文選同後漢書靈帝紀建寧四年正月甲子是有乙亥無丁亥注文誤卒凡我四方同好之人永
 懷哀痛乃樹碑表墓昭銘景行云陳畱蔡伯喈范陽盧

子幹扶風馬日磾等遠來奔喪持朋友服心喪期年者
 如韓子助宋子浚等二十四人其餘門人著錫衰者千
 數其碑文故蔡伯喈謂盧子幹馬日磾曰吾為天下碑
 文多矣皆有慙容惟郭有道無愧於色矣汾水之右有
 左部城側臨汾水蓋劉淵為晉都尉所築也

又南過冠爵津

汾津名也在界休縣之西南俗謂之雀鼠谷數十里間
 道嶮隘水左右悉結偏梁閣道纍石就路縈帶巖側或
 去水一丈或高五六尺上戴山阜下臨絕澗俗謂之為
 魯般橋蓋通古之津隘矣亦在今之地嶮也

太平寰宇記靈石縣

下引水經云汾水又南過冠爵津與桐水合注云汾水關名也在雀谷一名雀津俗謂之雀鼠谷校勘云按今水經及注與此皆小異大抵今記所引古書但取其意而增損其文務要通俗不與古書合又寰宇記洪洞縣下引水經云霍山北有雀鼠谷中道險左右悉結成偏梁累石就路俗謂之魯般橋與今文差近也

又南入河東界又南過永安縣西

故彘縣也周厲王流于彘卽此城也王莽更名黃城漢順帝陽嘉三年改曰永安縣霍伯之都也歷唐城東瓚注漢書云堯所都也東去彘十里汾水又東與彘水合水出東北太岳山禹貢所謂岳陽也卽霍太山矣上有飛廉墓飛廉以善走事紂惡來以多力見知周王伐紂兼殺惡來飛廉先爲紂使北方還無所報乃壇于霍太

山而致命焉得石棺銘曰帝令處父不與殷亂賜汝石棺以葬死遂以葬焉霍太山有岳廟廟甚靈鳥雀不棲其林猛虎常守其庭又有靈泉以供祭祀鼓動則泉流聲絕則水竭湘東陰山縣有侯曇山上有靈壇壇前有石井深數尺居常無水及臨祈禱則甘泉湧出周用則已亦其比也彘水又西流逕觀阜北故百邑也原過之從襄子也受竹書於王澤以告襄子襄子齋三日親自剖竹有朱書曰余霍太山山陽侯天使也三月丙戌余將使汝反滅智氏汝亦立我於百邑也襄子拜受三神之命遂滅智氏祠三神於百邑使原過主之世謂其處

為觀阜也絺水又西流逕永安縣故城南西南流注于汾水汾水又南逕霍城東故霍國也昔晉獻公滅霍趙夙為御霍公求奔齊晉國大旱卜之曰霍太山為祟使趙夙召霍君奉祀晉復穰也蓋霍公求之故居也汾水又逕趙城西南穆王以封造父趙氏自此始也汾水又南霍水入焉水出霍太山發源成潭漲七十步而不測其深西南逕趙城南西流注于汾水

太平寰宇記洪洞縣下引水經云霍水出趙城縣東三十八里廣勝寺大郎神西流至洪洞縣界與今本異

又南過楊縣東

澗水東出穀遠縣西山西南逕楊縣霍山南又西逕楊

縣故城北晉大夫僚安之邑也應劭曰故楊侯國王莽更名有年亭也其水西流入于汾水汾水逕楊城西不於東矣魏土地記曰平陽郡治楊縣郡西有汾水南流者是也

西南過高粱邑西

黑水出黑山西逕楊城南又西與巢山水會山海經曰牛首之山勞水出焉西流注于滴水疑是水也滴水即巢山之水也水源東南出巢山東谷北逕浮山東又西北流與勞水合亂流西北逕高粱城北西流入于汾水又南逕高粱故城西故高粱之墟也春秋僖公二十四

年秦穆公納公子重耳於晉害懷公於此竹書紀年晉出公十三年智伯瑤城高粱漢高帝十二年以為侯國封恭侯酈疥於斯邑也

又南過平陽縣東

汾水又南逕白馬城西魏刑白馬而築之故世謂之白馬城今平陽郡治汾水又南逕平陽縣故城東晉大夫趙鼂之故邑也應劭曰縣在平河之陽堯舜並都之也竹書紀年晉烈公元年韓武子都平陽漢初曹參擊魏王豹走之盡有魏地後封列侯食邑平陽固斯境矣昭帝封度遼將軍范明友為侯國王莽之香平也晉立平

陽郡治此矣

一清按三國志魏書三少帝紀齊王芳正始八年夏五月分河東之汾北十縣為平

陽郡非始于晉也

水側有堯廟廟前有碑魏土地記曰平陽城

東十里汾水東原上有小臺臺上有堯神屋石碑永嘉

三年劉淵徙平陽於汾水得白玉印方四寸高二寸二

分龍紐其文曰有新寶之印王莽所造也淵以為天授

改永鳳二年為河瑞元年汾水南與平水合水出平陽

西壺口山尚書所謂壺口治梁及岐也

禹貢錐指曰冀州有三壺口一

在吉州西南禹貢之壺口也一為汾陰縣西南之平山

平水所出亦名壺口山又名姑射山酈道元謬以為尚

書之壺口一在長治縣東南左傳哀公四年齊國夏伐

晉取壺口杜註潞縣東有壺口關潞縣即今潞城縣關

今吉州也後魏延興四年於此置定陽郡及縣元和志云北屈故縣在定陽郡北二十里今州直北之地山當在其西南漢志云東南誤也其水東逕狐谷亭北春秋時狄侵晉取

狐廚者也又東逕平陽城南東入汾俗以為晉水非也汾水又南歷襄陵縣故城西晉大夫卻犇之邑也故其

地有犇氏鄉亭矣西北有晉襄公陵縣蓋卽陵以命氏也王莽更名曰幹昌矣

又南過臨汾縣東

天井水出東陘山西南北有長嶺嶺上東西有通道卽

鉞隆也穆天子傳曰乙酉天子西絕鉞隆西南至鹽是也其水三泉竒發西北流總成一川西逕堯城南又西

南流入汾

又屈從縣南西流

汾水又逕絳縣故城北竹書紀年梁惠成王二十五年

絳中地塉西絕於汾汾水西逕虎祁宮北橫水有故梁截汾水中凡有三十柱柱徑五尺裁與水平蓋晉平公之故梁也物在水故能持久而不敗也又西逕魏正平

郡南故東雍州治太和中皇都徙洛罷州立郡矣又西逕王橋澮水入焉

又西過長修縣南

汾水又西與古水合水出臨汾縣故城西黃阜下其大

若輪西南流故溝橫出焉東注于汾今無水又西南逕
 魏正平郡北又西逕荀城東古荀國也汲郡古文晉武
 公滅荀以賜大夫原氏黯是為荀叔也古水又西南入
 于汾汾水又西南逕長修縣故城南漢高帝十一年以
 為侯國封杜恬一清按史表曰一云杜恪也有脩水出縣南而西南
 流入汾汾水又西逕清原城北故清陽亭也城北有清
 原晉侯蒐清原作三軍處也汾水又逕冀亭南昔曰季
 使過冀野見卻缺耨其妻饁之相敬如賓言之文公文
 公命之為卿復與之冀京相璠曰今河東皮氏縣有冀
 亭古之冀國所都也杜預釋地曰平陽皮氏縣東北有

冀亭即此亭也汾水又西與華水合水出北山華谷西
 南流逕一故城西俗謂之梗陽城非也梗陽在榆次非
 在此案故漢上谷長史侯相碑云侯氏出自倉頡之後
 踰殷歷周各以氏分或著楚魏或顯齊秦晉卿士為斯
 其裔也食采華陽今蒲坂北亭地即是城也其水西南
 流注于汾汾水又逕稷山北在水南四十許里山東西
 二十里南北三十里高十三里西去介山一十五里山
 上有稷祠山下稷亭春秋宣公十五年秦桓公治兵于
 稷以略狄土朱氏謀璋箋曰孫汝澄云按左傳秦桓公伐晉晉侯治兵于稷以略狄土是也
 又西過皮氏縣南

汾水西逕郟邱北故漢氏之方澤也賈逵云漢法三年祭地汾陰方澤澤中有方邱故謂之方澤邱卽郟邱也許慎說文稱從邑癸聲河東臨汾地名矣在介山北山卽汾山也其山特立周七十里高三十里文穎言在皮氏縣東南側可三十里乃非也今準此山可高十餘里山上有神廟廟側有靈泉祈祭之日周而不耗世亦謂之子推祠揚雄河東賦曰靈輿安步周流容與以覽于介山嗟文公而愍推兮勤大禹于龍門晉太康記及地道記與永初記竝言子推所逃隱於是山卽實非也余按介推所隱者緜山也文公環而封之爲介推田號其

山爲介山杜預曰在西河界休縣者是也汾水又西逕耿鄉城北故殷都也帝祖乙自相徙此爲河所毀故書敘曰祖乙圮于耿杜預曰平陽皮氏縣東南耿鄉是也盤庚以耿在河北迫近山川乃自耿遷亳後晉獻公滅之以封趙夙一清按此註語有病漢志云耿鄉故耿國晉獻公滅之以賜大夫趙夙斯爲無弊也後襄子與韓魏分晉韓康子居平陽魏桓子都安邑號爲三晉此其一也漢武帝行幸河東濟汾河作秋風辭于斯水之上汾水又西逕皮氏縣南竹書紀年魏襄王十二年秦公孫爰率師伐我圍皮氏翟章率師救皮氏圍疾西風十三年城皮氏者也漢河東太守番係穿渠

引汾水以溉皮氏縣故渠尚存今無水

又西至汾陰縣北西注于河

水南有長阜背汾帶河阜長四五里廣二里餘高十丈

汾水歷其陰西入河漢書謂之汾陰雕應劭曰雕邱類

也汾陰男子公孫祥望氣寶物之精上見祥言之于武

帝武帝于水獲寶鼎焉遷于甘泉宮改其年曰元鼎即

此處也

沈氏曰望氣者汾陰男子公孫滂洋上遂立后土祠于汾陰雕見漢書郊祀志得鼎者汾陰巫

錦上遂改元見史記封禪書自是二事且公孫滂洋非祥也得鼎于地非水也

澮水出河東絳縣東澮交東高山

澮水東出絳高山亦曰河南山又曰澮山西逕翼城南

按詩譜言晉穆侯遷都于絳暨孫孝侯改絳為翼翼為

晉之舊都也後獻公又北廣其城方二里又命之為絳

故司馬遷史記年表稱獻公九年始城絳都左傳莊公

二十六年晉士蔿城絳以深其宮是也其水又西南合

黑水水導源東北黑水谷西南流逕翼城北右引北川

水出平川南流注之亂流西南入澮水澮水又西南與

諸水合謂之澮交竹書紀年曰莊伯十二年翼侯焚曲

沃之禾而還作

一清按作字疑誤

為文公也又有賀水東出近

川西南至澮交入澮又有高泉水出東南近川西北趣

澮交注澮又南紫谷水東出白馬山白馬川遁甲開山

圖曰絳山東距白馬山謂是山也西逕熒庭城南而西出紫谷與乾河合即教水之枝川也史記白起傳稱起涉河取韓安邑東至乾河是也其水西與田川水合水出東谿西北至澮交入澮又有女家水出于家谷竹書紀年曰莊伯以曲沃叛伐翼公子萬救翼荀叔軫追之至于家谷有范壁水出于壁下竝西北流至翼廣城昔晉軍北入翼廣以築之因即其姓以名之二水合而為全氏曰此處有脫文西北流至澮交入澮澮水又西南與絳水合俗謂之白水非也水出絳山東南寒泉奮湧揚波北注懸流奔壑一十許丈青崖若點黛素湍如委練望之極

為奇觀矣其水西北流注于澮應劭曰絳水出絳縣西南蓋以故絳為言也史記稱智伯率韓魏引水灌晉陽不沒者三版智氏曰吾始不知水可以亡人國今乃知之汾水可以浸平陽絳水可以浸安邑時韓居平陽魏居安邑魏桓子肘韓康子韓康子履魏桓子肘足接于車上而智氏以亡魯定公問一言可以喪邦有諸孔子以為幾乎余觀智氏之譚矣汾水灌平陽或亦有之絳水澆安邑未識所由也資治通鑑周威烈王紀云以汾水灌安邑絳水可以灌平

陽也胡氏三省註曰水經注曰絳水出絳縣西南蓋以故絳為言其水出絳山東西北流而合于澮猶在絳縣界中智伯所謂汾水可以灌安邑或亦有之絳水可以灌平陽未識所由余謂自春秋之季至于元魏歷年滋

多郡縣之離合山川之遷改有不可以一時所睹為據者史記正義曰韓初都平陽今晉州也括地志曰絳水一名白水今名沸泉源出絳山可接引灌平陽城酈道元父範歷仕三齊少長齊地熟其山川後入關死于道未嘗至河東也此蓋因耳學而致疑括地志成于唐之魏王泰羅致天下一時名儒以作此書其考據宜詳當取以為據一清按梅磻所引酈注與今本全相乖迕閻百詩潛邱劄記曰汾水可以灌平陽絳水可以澆安邑此亦何須說余嘗往來于平陽夏縣而悟二語具有妙解蓋汾水并可以灌安邑至絳水則又不待言絳水并可以灌平陽至汾水則又不待言交錯互舉總見水之為害溥爾然梁書韋叡傳卻是吾聞汾水可以灌平陽絳水可以灌安邑舊史云汾水可以灌安邑絳水可以灌平陽乃文互耳又云涑水在蒲州東十里有孟盟橋其上流即絳水自絳縣歷聞喜夏縣安邑猗氏至臨晉縣界合姚暹渠而西出又西南注于大河俗名陽安澗水水經注涑水出雷首山縣北與蒲坂分水是也戰國策絳水可以灌安邑以絳水為涑水蓋合聞喜河北二涑水為一今

西過其縣南

觀道元注絳水出絳山下流入澮澮入汾汾入河不與涑水合也

春秋成公元年晉悼公謀去故絳欲居郇瑕魏莊子曰

何氏曰事在成六年非元年晉景公非悼公韓獻子非魏莊子柳子厚晉問魏絳之言曰近寶則公室乃貧自本水經注非不記左氏傳故以示博也

其惡遂居新田又謂之絳即絳陽也蓋在絳澮之陽漢

高帝六年封越騎將軍華無害為侯國

元凱成六年故絳注曰晉復命新田為絳故謂此為故絳杜蓋以新田為新絳也酈氏遂用其說然莊二十六

年士蔦城絳杜注曰絳晉所都今平陽絳邑縣而新田又復注又曰今平陽絳邑縣是夫故絳既絳邑而新田又復

同墟杜之釋地殆自相伐且般人五遷不稱新亳周京屢徙非帶舊幽齊都臨淄便棄薄姑之號楚移湫都豈

仍故郢之思矧絳本非嘉名不過以水氏縣晉人何所
 取而三以命都哉又史記越將絳陽侯無害司馬貞考
 地理志無絳陽而漢表作終陵則史記之絳陽未足以
 證新田也閻氏若璩曰故絳在太平縣南二十五里絳
 州之北土人至今呼故晉城新絳去故晉城五十里土
 人呼為王官城一清按卮林之說甚辨然究不能名終
 陵為何地漢表華毋害孫祿失侯其曾孫於陵大夫告
 元康四年詔復家迺知終陵者於陵之訛地理志於陵
 濟南郡縣南對絳山面背二水古文瑣語曰晉平公與
 齊景公乘至于澮上見乘白驂八駟以來有犬狸身而
 狐尾隨平公之車公問師曠對曰首陽之神有犬狸身
 狐尾其名曰朱氏謀瑋箋曰名曰一作逢君者飲酒得福則徼之蓋於
 是水之上也

又西南過虎祁宮南

宮在新田絳縣故城西四十里晉平公之所構也時有
 石言於魏榆晉侯以問師曠曠曰石不能言或憑焉臣
 聞之作事不時怨讎動于民則有非言之物言也今宮
 室崇侈民力彫盡石言不亦宜乎叔向以為子野之言
 君子矣其宮地背汾面澮西則兩川之交會也竹書紀
 年曰晉出公五年澮絕于梁即是水也

又西至王橋注于汾水

晉智伯瑤攻趙襄子襄子奔保晉陽原過後至遇三人
 於此澤自帶以下不見持竹二節與原過曰為我遺無
 卹原過受之於是澤所謂王澤也

涑水出河東聞喜縣東山黍葭谷

涑水所出俗謂之華谷 太平寰宇記校勘云涑水出黎葭谷俗謂之葦谷水經涑水出

黍薛谷俗謂之華谷今黍作黎薛作葭葭華作葦未知孰是一清按校勘不知何人所作其云水經以黎葭為黍

薛今本皆作黍葭與校勘所見之本異當作黍葭為是又汾水篇長修縣下注云汾水又西與華水合水出北

山華谷蓋其地相連接北史載韋孝寬之守玉壁請于華谷及長秋築城及周武帝東伐趙王招率兵出稽胡

敕孝寬為行軍總管圍守華谷以應接之即是谷也至周陽與洮水合水源東出

清野山世人以為清襄山也其水東逕大嶺下西流出

謂之哈口又西合涑水鄭使子產問晉平公疾平公曰

卜云臺台為祟史官莫知敢問子產曰高辛氏有二子

長曰闕伯季曰實沈不能相容帝遷闕伯于商邱遷實

沈于大夏臺台實沈之後 全氏曰按善長于左學甚疎左氏明云實沈出高辛為參

神臺台出金天為汾神是二祟也能業其官帝用嘉之

乃曰臺台實沈之後不其舛與 國于汾川由是觀之臺台汾洮之神也賈逵曰汾洮二

水名司馬彪曰洮水出聞喜縣故王莽以縣為洮亭也

全氏曰按漢志王莽以左邑為洮亭然則涑水殆亦洮

水之兼稱乎

又西過周陽邑南

其城南臨涑水北倚山原竹書紀年晉獻公二十五年

正月翟人伐晉周陽有白兔舞于市即是邑也漢景帝以

封田勝為侯國也 沈氏曰索隱曰在上郡則是陽周之

封周陽索隱皆以為陽周然考周陽由以周陽侯受姓則非陽周矣恐是索隱之誤善長所云足以正史表之失也一清按外戚世家索隱曰周陽縣名屬魏郡是又一說也尋地理志無之故不足為據又按趙兼以淮南王舅封而厲王子賜亦封周陽後以侯立為廬江王則其地當在九江廬江境內而今不可攷矣 涑水

西逕董澤陂南即古池東西四里南北三里春秋文公

六年蒐于董澤即斯澤也何氏曰左傳作蒐于董杜元凱註云汾陰縣有董亭宣十二年傳董澤之蒲註云澤名河東聞喜縣東北有董澤陂則文六年改蒐于董者非董澤也涑水又

與景水合水出景山北谷山海經曰景山南望鹽販之

澤北望少澤其草多藎蕪秦椒其陰多赭其陽多玉郭

景純曰鹽販之澤即解縣鹽池也按經不言有水今有

水焉西北流注于涑水也

又西南過其縣南

涑水又西逕仲邨邨一清按三字疑有誤趙氏琦美曰小學書無邨字疑是郭字亦未有

據說文高陵有邨徒歷切則邨本地名北又西逕桐鄉城北竹書紀年曰

翼侯伐曲沃大捷武公請成于翼至桐庭乃返者也漢

書曰漢武帝元鼎六年將幸緱氏至左邑桐鄉聞南越

破以為聞喜縣者也涑水又西與沙渠水合水出東南

近川西北流注于涑水涑水又西南逕左邑縣故城南

故曲沃也晉武公自晉陽徙此全氏曰按晉穆侯自晉陽徙翼武公自翼徙曲沃善長

誤矣秦改為左邑縣詩所謂從子于鵠者也春秋傳

曰下國有宗廟謂之國在絳曰下國矣即新城也王莽

之洮亭也涑水自城西注水流急濬輕津無緩故詩人
 以為激揚之水言不能流移束薪耳水側即狐突遇申
 生處也春秋傳曰秋狐突適下國遇太子太子使登僕
 曰夷吾無禮吾請帝以畀秦對曰神不歆非類君其圖
 之君曰諾請七日見我於新城西偏及期而往見於此
 處故傳曰鬼神所憑有時而信矣涑水又西逕王官城
 北城在南原上春秋左傳成公十三年四月晉侯使呂
 相絕秦曰康猶不悛入我河曲伐我涑川俘我王官故
 有河曲之戰是矣今世人猶謂其城曰王城也
 又西南過安邑縣西

安邑禹都也禹娶塗山氏女思戀本國築臺以望之今
 城南門臺基猶存余按禮天子諸侯臺門隅阿相降而
 已未必一如書傳也故晉邑矣春秋時魏絳自魏徙此
 昔文侯縣師經之琴於其門以為言戒也武侯二年又
 城安邑蓋增廣之秦始皇使左更白起取安邑置河東
 郡王莽改名洮陽全氏曰洮陽當作洮隊乃巨君六隊
 之一今本漢志亦誤以莽傳考之則
 知善長所見之漢書亦已誤矣縣曰河東也有項曼都學道昇仙忽復
 還此河東號曰斥仙漢世又有閔仲叔隱遁市邑罕有

知者後以識瞻而去涑水又西南逕監鹽縣故城

一清按後

漢書靈帝紀熹平四年遣守宮令之鹽監穿渠為民興
 利章懷注曰前漢地理志及續漢郡國志竝無鹽監今

蒲州安邑縣西南有鹽池鹽監即監鹽城也 城南有鹽池上承鹽水水出東

南薄山西北流逕巫咸山北地理志曰山在安邑縣南

海外西經曰巫咸國在女丑北右手操青蛇左手操赤

蛇在登葆山羣巫所從上下也大荒西經云大荒之中

有靈山巫咸巫即巫盼巫彭巫姑巫貞巫孔巫抵巫謝

巫羅一清按山海經巫貞作巫真巫孔作巫禮禮本書作礼形似孔字然寰宇記引注文亦作孔字是宋

初本已十巫從此升降百藥爰在郭景純曰言羣巫上

下靈山採藥往來也蓋神巫所遊故山得其名矣谷口

嶺上有巫咸祠其水又逕安邑故城南又西流注于鹽

池地理志曰鹽池在安邑西南許慎謂之鹽鹽長五十

一里廣六里周一百一十四里從鹽省古聲呂忱曰宿

沙煮海謂之鹽河東鹽池謂之解鹽今池水東西七十

里南北十七里紫色澄渟渾而不流水出石鹽自然印

成朝取夕復終無減損唯水暴雨澍甘潦奔洑則鹽池

用耗故公私共竭水徑防其淫濫故謂之鹽水亦為竭

水也故山海經謂之鹽販之澤也澤南面層山天巖雲

秀地谷泉深左右壁立間不容軌謂之石門路出其中

名之曰徑南通上陽北暨鹽澤一清按解州有白徑嶺路通陝州大陽津渡志

云由檀道山陡徑出白徑嶺趨陝州即石門百梯之險也注所云名之曰徑者也池西又有一

池謂之女鹽澤東西二十五里南北二十里在猗氏故

城南春秋成公六年晉謀去故絳大夫曰郇瑕地沃饒近鹽服虔曰土平有漑曰沃鹽鹽也土人鄉俗引裂沃麻分灌川野畦水耗竭土自成鹽卽所謂鹽鹺也而味苦號曰鹽田鹽鹽之名始資是矣本司鹽都尉治領兵一千餘人守之周穆王漢章帝竝幸安邑而觀鹽池故杜預曰猗氏有鹽池後罷尉司分猗氏安邑置縣以守之

又南過解縣東又西南注于張陽池

涑水又西逕猗氏縣故城北春秋文公七年晉敗秦于令狐至于刳首先蔑奔秦士會從之闕駟曰令狐卽猗

氏也刳首在西三十里縣南對澤卽猗頓之故居也孔叢曰猗頓魯之窮士也耕則常飢桑則常寒聞朱公富往而問術焉朱公告之曰子欲速富當畜五牝於是乃適西河大畜牛羊于猗氏之南十年之間其息不可計貨擬王公馳名天下以興富於猗氏故曰猗頓也涑水又西逕郇城詩云郇伯勞之蓋其故國也杜元凱春秋釋地云今解縣西北有郇城服虔曰郇國在解縣東郇瑕氏之墟也余按竹書紀年云晉惠公十有五年

十四年說見河水篇秦穆公率師送公子重耳圍令狐桑泉曰衰

皆降於秦師狐毛與先軫禦秦至于廬柳

全氏曰狐毛與子犯兄弟

竝從文公其父突以此死如何反為子圍禦秦乃謂秦師耶竹書之繆甚矣董煨曰其時晉將為呂卻穆公使公子繫來與師言退舍次于郇盟于軍京相璠春秋土地名曰桑泉曰衰竝在解東南不言解明不至解可知春秋之文與竹書不殊今解故城東北二十四里有故城在猗氏故城西北鄉俗名之為郇城考服虔之說又與俗符賢于杜氏單文孤證矣涑水又西南逕解縣故城南春秋晉惠公因秦返國許秦以河外五城內及解梁即斯城也涑水又西南逕瑕城晉大夫詹嘉之故邑也顧氏炎武日知錄曰晉有二瑕其一左傳成公六年諸大夫皆曰必居郇瑕之地杜氏曰郇瑕古國名水經注涑水又西南逕瑕城京相璠曰今河東解縣西南五里有故瑕城是也在今之臨晉縣境

其一僖公三十年燭之武見秦伯曰許君焦瑕朝濟而夕設版焉解焦瑕晉河外五城之二邑文公十二年晉人秦人戰于河曲秦師夜遁復侵晉入瑕解以河曲在河東蒲坂縣南則瑕必在河外十三年晉侯使詹嘉處瑕以守桃林之塞按漢書地理志湖故曰胡武帝建元二年更名湖水經河水又東逕湖縣故城北古瑕胡二字通用禮記引詩心乎愛矣瑕不謂矣鄭氏註云瑕之言胡也瑕胡音同故記用其字是瑕轉為胡又改為湖而瑕邑即桃林之塞也今為閩鄉縣治成公十三年伐秦成肅公卒于瑕亦此地也道元以郇瑕之瑕為詹嘉之邑春秋僖公三十年秦晉圍鄭鄭伯使燭之武謂秦誤矣

穆公曰晉許君焦瑕朝濟而夕設版者也京相璠曰今河東解縣西南五里有故瑕城涑水又西南逕張陽城東竹書紀年齊師逐鄭太子齒奔張城南鄭者也漢書之所謂東張矣高祖二年曹參假左丞相別與韓信東

攻魏將孫林邀

全氏曰史記無林字

軍東張大破之蘇林曰屬河

東卽斯城也涑水又西南屬于陂陂分爲二城南面兩

陂左右澤渚東陂世謂之晉興澤東西二十五里南北

八里南對鹽道山其西則石壁千尋東則礪谿萬仞方

嶺雲迴奇峯霞舉孤標秀出罩絡羣山之表翠柏蔭峯

清泉灌頂郭景純云世所謂鴛漿也發于上而潛于下

矣厥頂方平有良藥神農本草曰地有固活女疎銅芸

紫苑之族也是以緇服思元之士鹿裘念一之夫代往

遊焉路出北巘勢多懸絕來去者咸援蘿騰崖尋葛降

深於東則連木乃陟百梯方降巖側縻鎖之跡仍今存

焉故亦曰百梯山也水自山北流五里而伏云潛通澤

渚所未詳也西陂卽張澤也西北去蒲坂一十五里東

西二十里南北四五里冬夏積水亦時有盈耗也

文水出大陵縣西山文谷東到其縣屈南到平陶縣東北

東入于汾

文水逕大陵縣故城西

一清按善長不記文水之所出而云逕大陵縣故城西蓋率筆

也太平寰宇記云出交城縣西南文谷大陵縣故城在文水縣北十三里發源此城流入文水縣界文水縣隋開皇十年置因縣西文水爲名而南流有泌水注之水出縣西南山下

武氏穿井給養井至幽深後一朝水溢平地東南注文

水又南逕平陶縣之故城東西逕其城內南流出郭王

莽更曰多穰也文水又南逕縣右會隱泉口水出謁泉
 山之上頂俗云暘雨愆時是謁是禱故山得其名非所
 詳也其山石崖絕險壁立天固崖半有一石室去地可
 五十餘丈爰有層松飾巖列柏綺望唯西側一處得歷
 級升陟頂上平地一十許頃沙門釋僧光表建二剎泉
 發于兩寺之間東流瀝石浴注山下又東津渠隱沒而
 不恆流故有隱泉之名矣雨澤豐澍則通入文水又南
 逕茲氏縣故城東為文湖東西一十五里南北三十里
 世謂之西河泊在縣直東一十里湖之西側臨湖又有
 一城謂之豬城水澤所聚謂之都亦曰豬蓋即水以名

城也文湖又東逕中陽縣故城東按晉書地道記太康
 地記西河有中陽城舊縣也文水又東南流與勝水合
 水出西狐岐之山東逕六壁城南魏朝舊置六壁於其
 下防離石諸胡因為大鎮太和中罷鎮仍置西河郡焉
 勝水又東合陽泉水出西山陽谿東逕六壁城北又東
 南流注于勝水勝水又東逕中陽縣故城南又東合文
 水文水又東南入于汾水也

原公水出茲氏縣西羊頭山東過其縣北

縣故秦置也漢高帝更封沂陽侯嬰為侯國

全氏曰沂陽是夏侯

嬰初封而食邑茲氏非封國也更封是汝陰

王莽之茲同也魏黃初二年置

西河郡西河恭王司馬子盛廟碑文云西河舊處山林

漢末擾攘百姓失所魏興更開疆宇分割太原四縣以

為邦邑全氏曰西河本漢郡建安之亂空荒其土黃初

復立而割太原之地以隸之攷晉志太原郡統

縣十三皆漢之舊所少者界休茲氏慮虎三縣碑云分

割四縣蓋破三為四也晉志西河郡統縣四離石隰城

中陽介休其三縣又皆是漢西河郡故縣名

蓋以此三縣之名加之茲氏慮虎之地耳其郡帶山

側塞矣王以咸寧四年改命爵土其年十二月喪國臣

大農閻崇離石令宗羣等二百三十四人刊石立碑以

述勳德碑北廟基尚存也一清按此碑文多與史異晉

宗室無司馬子盛其人者晉

書云西河繆王斌字子政魏中郎武帝受禪封陳王三

年改封西河咸寧四年薨其薨年與碑同而改封之歲

碑在四年傳在三年傳云字子政碑云子盛傳

云諡繆碑云諡恭善長親見其碑或是史誤

又東入于汾

水注文湖不至汾也

祠下者也善長

一清按原公水即洞渦水篇注之

洞渦水出沾縣北山

其水西流與南谿水合水出南山西北流注洞渦水又

西北黑水出西山三源合舍同歸一川東流南屈逕受

陽縣故城東按晉太康地記樂平郡有受陽縣盧諶征

艱賦所謂歷受陽而總轡者也其水西南入洞渦水又

西蒲水南出蒲谷北流注之于洞渦又西與原過水合

近北便水源也水西阜上有原過祠蓋懷道協靈受書

天使憂結宿情傳芳後日棟宇雖淪攢木猶茂故層巖水取名焉其水南流注于洞渦水也

西過榆次縣南又西到晉陽縣南

榆次縣故涂水鄉晉大夫智徐吾之邑也春秋昭公八年晉侯築虎祁之宮有石言晉之魏榆服虔曰魏晉邑

榆州里名也漢書曰榆次十三州志以為涂陽縣矣王

莽之太原亭也縣南側水有鑿臺韓魏殺智伯瑤於其

下刳腹絕腸折頸摺頤處也厄林曰史記智伯醉以酒灌擊毋卹又豫讓傳襄子

怨智伯漆其頭以為飲器乃知漆頭之謔實報灌首之

辱諸家解同虎子已屬靡言而水經注曰韓魏殺智伯

刳腹絕腸折頸摺頤處也蓋所未聞尋史記及新序載

黃歇上秦王書曰智氏信韓魏從而伐趙韓魏叛之殺

智伯瑤于鑿臺之下又曰韓魏父子兄弟接踵而死于

秦者十世社稷壞宗廟隳刳腹絕腸折頸摺頤身首分

離暴骨于草澤此春申極言韓魏之怨秦而鄆氏誤以為智伯見屠之酷可謂疏鹵矣其水又西

南流逕武觀城西北盧諶征艱賦曰逕武館之故郭問

厥塗之遠近洞渦水又西南為淳湖謂之洞湖津而涂

水注之水出陽邑東北大嶸山涂谷西南逕蘿磨亭南

與蔣谷水合水出縣東南蔣谿魏土地記曰晉陽城東

南一百一十里至山有蔣谷大道度軒車嶺通于武鄉

水自蔣谿西北流西逕箕城北春秋僖公三十三年晉

人敗狄于箕杜預釋地曰城在陽邑南水北即陽邑縣

者也王莽之繁穰矣蔣谿又西合涂水亂流西北入洞渦澤也

西入于汾

出晉水下口者也劉琨之為并州也劉淵引兵邀擊之

合戰于洞渦卽是水也

一清按晉書劉曜攻晉陽劉琨使張喬拒之戰于武灌喬敗死

晉陽太守高錕等皆降琨屯榆次與左右數十騎攜妻子奔趙郡遂如常山酈以為琨與劉淵戰誤也

晉水出晉陽縣西縣壩山

縣故唐國也春秋左傳稱唐叔未生其母邑姜夢帝謂已曰余名而子曰虞將與之唐屬之參及生名之曰虞呂氏春秋曰叔虞與成王居王援桐葉為珪以授之曰

吾以此封汝虞以告周公周公請曰天子封虞乎王曰

余戲耳公曰天子無戲言時唐滅乃封之於唐縣有晉

水後改名為晉故子夏敘詩稱此晉也而謂之唐儉而

用禮有堯之遺風也晉書地道記及十三州志竝言晉

水出龍山一云出結紉山在縣西北非也山海經曰縣

壩之山晉水出焉今在縣之西南昔智伯遏晉水以灌

晉陽其川上源後人踵其遺蹟蓄以為沼沼西際山枕

水有唐叔虞祠

方輿紀要云臺駘驛在太原縣南十里即晉澤也舊為晉水匯流處蒲魚所鍾

水經注晉祠南有難老善利二泉大旱不涸隆冬不凍溉田百餘頃又有泉出祠下曰滴瀝泉其泉導流為晉

水瀦為晉澤今本無之水側有涼堂結飛梁於水上左右雜樹交

蔭希見曦景至有淫朋密友羈遊宦子莫不尋梁契集用相娛慰於晉川之中最為勝處

又東過其縣南又東入于汾水

沼水分為二派北瀆即智氏故渠也昔在戰國襄子保晉陽智氏防山以水之城不沒者三版與韓魏望歎於此故智氏用亡其瀆乘高東北注入晉陽城以周圍漑漢末赤眉之難郡掾劉茂負太守孫福匿於城門西下空穴中其夜奔孟即處也東南出城流注于汾水也其南瀆於石塘之下伏流逕舊谿東南出逕晉陽城南城在晉水之陽曰晉陽矣經書晉荀吳帥師敗狄于大

鹵杜預曰大鹵晉陽縣也為晉之舊都春秋定公十三年趙鞅以晉陽叛後乃為趙矣其水又東南流入于汾
湛水出河內軹縣西北山

湛水出軹縣南原湛谿俗謂之須水也全氏曰先司空曰須讀作頒是蓋聲畫鄰故字讀俱變同于三豕之誤耳其水自谿

又南流

東過其縣北又東過波縣之北

湛水南逕向城東而南注

又東過毋辟邑南

原經所注斯乃溟川之所由非湛水之間關也是經之

誤證耳湛水自向城東南逕湛城東時人謂之湛城亦
或謂之隰城矣谿曰隰澗隰城在東言北非矣後漢郡
國志曰河陽縣有湛城是也

又東南當平陰縣之東北南入于河

湛水又東南逕鄧南流注于河故河濟有鄧津之名矣

水經注釋卷六終

水經注釋卷七

濟水一

仁和趙一清誠夫錄

濟水出河東垣縣東王屋山為沅水

山海經曰王屋之山聯水出焉西北流注于泰澤郭景
純云聯沅聲相近沅即濟也潛行地下至其山南復出
于東邱今原城東北有東邱城孔安國曰泉源為沅流
去為濟春秋說題辭曰濟齊也齊度也貞也風俗通曰
濟出常山房子縣贊皇山廟在東郡臨邑縣濟齊其度
量也余按二濟同名也所出不同鄉源亦別斯乃應氏

之非矣一清按漢書地理志河東郡垣縣禹貢王屋山
在東北沁水所出其前載禹貢導沁水文俱作
涉字又常山郡房子縣贊皇山石濟水所出說文云涉
沁也東入海又云濟水出常山房子贊皇山東入泲漢
人學有師承孟堅地志叔重說文尤精覈謹嚴千古取
證應仲瑗始誤以出常山之濟為四瀆之涉善長非之
是矣而猶云二濟同名未免騎牆之見也江南徐錯撰
說文繫傳通釋云漢書房子縣贊皇山濟水所出東至
慶陶入泲此非四瀆之濟四瀆之濟古皆作涉今人多
亂之又云涉水今多作濟故與常山濟水相亂此則四
瀆之涉楚金辨涉濟二字可謂了了足以證明孟堅而
羽翼叔重然不云常山石濟而單云常山濟水猶有所
蔽乃元吳澄書纂言云導水章所敘冀州之濟兗州之
濟實一水也濟涉二字通用說文因二字而以北濟南
濟為二水非也今說文具在何嘗有南濟北濟之分且
全不考水道之源委宋於自信輕毀古義厚誣前哲如
此唐徐堅初學記云二濟既南北異岸相去亦踰千里
渠雖習尚詞章尚能別白不似草廬解經反致淆亂也

今濟水重源出溫城西北平地水有二源東源出原城

東北昔晉文公伐原以信而原降即此城也俗以濟水
 重源所發因復謂之濟源城其水南逕其城東故縣之
 原鄉杜預曰沁水縣西北有原城者是也南流與西源
 合西源出原城西東流水注之水出西南東北流注于
 濟濟水又東逕原城南東合北水亂流東南注分為二
 水一水東南流俗謂之為衍水即沁水也衍沁聲相近
 傳呼失實也濟水又東南逕郟城北而出於溫矣其一
 水枝津南流注於淇水出原城西北原山勳掌谷俗謂
 之為白澗水南逕原城西春秋會于淇梁謂是水之墳
 梁也爾雅曰梁莫大于淇梁梁水堤也淇水又東南逕

陽城東與南源合水出陽城南溪陽亦樊也一日陽樊國語曰王以陽樊賜晉陽人不服文公圍之倉葛曰陽有夏商之嗣典樊仲之官守焉君而殘之無乃不可乎公乃出陽人春秋樊氏叛惠王使虢公伐樊執仲皮歸于京師即此城也其水東北流與漫流水合水出軹關南東北流又北注于淇謂之漫流口淇水又東合北水亂流東南左會濟水枝渠淇水又東逕鍾繇塢北世謂之鍾公壘又東南塗溝水注之水出軹縣西南山下北流東轉入軹縣故城中又屈而北流出軹郭漢文帝元年封薄昭為侯國也又東北流注于淇淇水又東北逕

波縣故城北漢高帝封公上不害為侯國

一清按史表作波侯漢表

作汲侯索隱曰波與汲並縣名屬河內蓋莫能定也善長從史表書之

淇水又東南流天

漿澗水注之水出軹南舉向城北城在舉上俗謂之韓

王城非也京相璠曰或云今河內軹西有城名向今無

杜元凱春秋釋地亦言是矣蓋相襲之向故不得以地

名而無城也闕駟十三州志曰軹縣南山西曲有故向

城即周向國也傳曰向姜不安于莒而歸者矣

全氏曰按左傳

盟向之向在周圻內杜所云軹縣者也向姜之向地在莒州善長誤合為一

汲郡竹書紀年

曰鄭侯使韓辰歸晉陽及向二月城陽向更名陽為河

雍向為高平即是城也其水有二源俱導各出一溪東

北流合為一川名曰天漿溪又東北逕一故城俗謂之
 冶城水亦曰冶水又東流注于溲溲水又東南流右會
 同水水出南原下東北流逕白騎塢南塢在原上為三
 谿之會北帶深隍三面岨嶮唯西版築而已東北流逕
 安國城西又東北注溲水溲水東南逕安國城東又南
 逕毋辟邑西世謂之無比城亦曰馬髀城皆非也朝廷
 以居廢太子謂之河陽庶人也溲水又南注於河也

又東至溫縣西北為濟水又東過其縣北
 濟水於溫城西北與故瀆分南逕溫縣故城西周畿內
 國司寇蘇忿生之邑也春秋僖公十年狄滅溫溫子奔

衛周襄王以賜晉文公濟水南歷虢公臺西皇覽曰溫
 城南有虢公臺基趾尚存濟水南流注于河郭緣生述
 征記曰濟出河內溫縣注于河蓋浴歷之實證非為謬
 說也濟水故瀆於溫城西北東南出逕溫城北又東逕
 虢公冢北皇覽曰虢公冢在溫縣郭東濟水南大冢是
 也濟水當王莽之世川瀆枯竭其後水流逕通津渠勢

改尋梁脈水不與昔同通典曰詳水經所作殊為詭誕

王莽末因旱渠塞不復截河南過既順帝時所撰郡國志悉其餘可知景純注解又甚疎略又曰按後漢郡國志曰因王莽末旱此渠枯竭濟但入河而已不復截流而南水經是和帝以後所撰乃云南過滎陽封邱兔句乘氏等縣茲今縣地一依尚書禹貢舊道斯不詳之甚酈道元又從而注之其所纂序及注解並大紕繆一清

按杜氏兩言濟水水經及注之失一在雍州風俗下一
 在荊州河南府濟源縣下然以經為和帝後所撰又云
 順帝時撰注則云景純又云道元何無定見也禹貢雖
 指解之曰河北之濟因旱而枯旱止則復出河南之濟
 為濁河所侵空竇盡室河去不復能上涌故遂絕自東
 漢以迄唐初凡行濟瀆者皆河水也而猶目之曰濟是
 鵲巢而鳩居觚名而園實也故杜氏力詆水經以為不
 可信然榮濟故道猶可因是而得其十之七八則此書
 不為無補焉黃文叔云濟水雖絕其瀆猶在雖中間經
 穿鑿變易或斷或續然水之附入於其瀆者猶可尋求
 緝之以存禹迹非無理也斯言蓋得其平又曰濟瀆之
 水自周以來凡數變初為濟及導榮為川則榮與濟合
 鴻溝既開榮瀆為河所亂及榮澤又塞則所行者惟河
 水矣汴渠不通則鉅野以北所行惟荷汶戴村已築則
 東阿以下所行唯山泉溝澤之水其號為濟者襲舊名
 而已水經所敘瀆同而水異水異故李宏憲云河南無
 濟水瀆同故黃文叔云禹迹賴此而猶存言非一端各
 有所當今與人論濟水苟以為無則羣指七十二泉大
 小清河以相難若以為有則又據杜佑之說詆水經不
 當襲舊名為濟明道謂與公言如扶醉人扶得一邊起

又倒卻一邊真可笑又可憎也古文尚書疏證又為之
 解曰濟水當王莽時大旱遂枯絕不復截河南過者晉
 初司馬彪之言也雖經枯竭其後水流逕通津渠勢改
 尋梁脈水不與昔同者後魏酈道元之言也通典據彪
 之言以折水經謂濟渠既塞都不詳悉其餘可知余讀
 郭璞山海經注而歎恐未足以服水經之心何則璞固
 有言矣今濟水自滎陽卷縣東經陳畱至濟陰北東北
 至高平東北經濟南至樂安博昌縣入海與禹時濟瀆
 所經河南之道無異蓋枯而復通者所謂津渠勢改昔
 則自號公臺東入河出在敖倉之東南今改流自號公
 臺西入河出亦非故處與或禹時濟水必分南北此則
 分而為二為不同與又潛邱劄記曰黃子鴻篤信水經
 注者憶初晤碧山堂問曰後漢志溫縣濟水出王莽時
 大旱遂枯絕是河南無濟今且千六百七十餘年矣何
 酈道元言之詳且析也子鴻曰新莽時雖枯後復見酈
 氏所謂其後水流逕通津渠勢改尋梁脈水不與昔同
 是也祇緣杜君卿不信水經專憑司馬彪志竊以為彪
 不過記一時之災變耳非謂永截河南過也君卿云
 云遂真覺河南無濟疑誤到今尚有宗主其說者余曰
 枯而復通既聞命矣敢問除酈注外抑別有徵乎子鴻

曰未聞余退而考杜預釋例云濟水自滎陽卷縣東逕陳畱至濟陰北經高平東平至濟北東北經濟南至樂安博昌縣入海郭璞山海經注云今濟水自滎陽卷縣東逕陳畱至濟陰北東北經濟南至樂安博昌縣入海張湛列子注云濟水出王屋山為沈水東經溫縣為濟水下入黃河十餘里南渡河為滎澤又經濟陰等九郡而入海稗此三說以覆于鴻喜獲所未聞復難余今不見河南有濟畢竟復枯于何代余復考得後漢書王景傳濟渠下章懷注云濟水出今洛州濟源縣西北東流經溫縣入河渡河東南入鄭州又東入滑曹鄆濟齊青等州入海即此渠也王莽末旱因枯涸但入河內而已似不知中有復通之事合以許敬宗對高宗濟水潛流屢絕是自唐以前濟已復枯直至今矣又曰有問濟水枯而復通畢竟在何時子曰考王景傳曰初平帝時河汴決壞未及得修建武十年陽武令張汜上言河決積久日月侵毀濟渠所漂數十許縣逮後三陶邱之北漸就壤墳此汴壤而濟亦壞汴治而濟亦治之徵也又考晉書傅祗傳武帝時為滎陽太守自魏黃初大水後河濟汎濫鄧艾嘗著濟河論開石門而通之

至是復侵壞祗乃造沈菜堰充豫無水患郗超傳太和
中桓溫將伐慕容氏引軍自濟入河超諫曰清水入河
無通運理毛穆之傳溫使穆之鑿鉅野百餘里引汶會
于濟此豈竟枯絕者哉大抵王莽世天災雖甚然皆不
遠而復班注云云蓋以目驗者言也祗緣司馬彪下語
太重若改遂枯絕為會枯絕則妙矣潛邱東樵之言明
白如此足以祛君卿之惑其無累于桑扈也明矣又孔
穎達左傳正義曰按檢水流之道今古或殊杜既考校
元由據當時所見載於釋例今一皆依杜雖與水經乖
異亦不復根尋也觀此則亦不以濟水為竟枯絕也

屈從縣東南流過隕城西又南當鞏縣北南入于河

濟水故瀆東南合奉溝水水上承朱溝於野王城西東

南逕陽鄉城北又東南流逕李城西秦攻趙邯鄲且降

傳舍吏子李同說平原君勝分家財饗士得敢死者三

千人李同與赴秦軍秦軍退同死封其父為李侯故徐

廣曰河內平臯縣有李城卽此城也於城西南爲陂水
 淹地百許頃蒹葭萑葦生焉號曰李陂又逕隕城西屈
 而東北流逕其城北又東逕平臯城南應劭曰邢侯自
 襄國徙此當齊桓公時衛人伐邢邢遷于夷儀其地屬
 晉號曰邢邱以其在河之臯處勢平夷故曰平臯瓚注
 漢書云春秋狄人伐邢邢遷夷儀不至此也今襄國西
 有夷儀城去襄國百餘里邢是邱名非國也余按春秋
 宣公六年赤狄伐晉圍邢邱昔晉侯送女于楚送之邢
 邱卽是此處也非無城之言一清按師古亦曰應說非也竹書紀年
 曰梁惠成王三年鄭城邢邱司馬彪後漢郡國志云縣

有邢邱故邢國周公子所封矣漢高帝六年沈氏曰封是七年
 碭郡長項佗爲侯國賜姓劉氏武帝以爲縣其水又南
 注于河也

與河合流又東過成臯縣北又東過滎陽縣北又東北至
 礫磎南東出過滎澤北

釋名曰濟濟也源出河北濟河而南也晉地道志曰濟
 自大伾入河與河水鬪南決爲滎澤尙書曰滎波旣豬
 孔安國曰滎澤波水以成遏豬闕駟曰滎嶧澤名也故

呂忱曰嶧水在滎陽謂是水也一清按滎嶧之嶧當作播禹貢雖指曰滎波旣
豬史記作播漢書作波閻百詩云馬鄭王本竝作播播
是澤名不從山作嶧可知也又說文潘水名在河南滎

陽从水番聲普官切不謂叔重有此大昔大禹塞其淫

繆此與闕駟以淵水為澗水正相似也禹貢雖指曰河與

水而於滎陽下引河東南以通淮泗滎瀆相亂其來已

久而滎澤在西漢時依然無恙故班固云濟水軼出滎

陽北地中謂滎澤也至東漢乃塞為平地酈道元云云

夫滎澤何以謂之淫水經曰滎波既豬禹方陂之以蓄

其水何以塞之誕妄不足深辨全氏曰以鴻溝為禹迹

善長之繆也而張垺等宗之濟水分河東南流漢明帝之世司空伏

恭薦樂浪人王景字仲通好學多藝善能治水顯宗詔

與謁者王吳始作浚儀渠吳用景法水乃不害此即景

作所修故瀆也渠流東注浚儀故復謂之浚儀渠也明

帝永平十五年東巡至無鹽帝嘉景功拜河隄謁者漢

靈帝建寧四年於敖城西北壘石為門以遏渠口謂之

石門故世亦謂之石門水門廣十餘丈西去河三里石

銘云建寧四年十一月黃場石也而主吏姓名磨滅不

可復識魏太和中又更修之撤故增新石字淪落無復

在者水北有石門亭戴延之所云新築城城周三百步

滎陽太守所鎮者也水南帶三皇山即皇室山亦謂之

為三室山也濟水又東逕西廣武城北郡國志滎陽縣

有廣武城城在山上漢所城也高祖與項羽臨絕澗對

語責羽十罪羽射漢祖中胸處也山下有水北流入濟

世謂之柳泉也濟水又東逕東廣武城北楚項羽城之

漢破曹咎羽還廣武為高俎置太公其上曰漢不下吾

水經注釋

烹之高祖不聽將害之項伯曰爲天下者不顧家但益
怨耳羽從之今名其壇曰項羽堆夾城之間有絕澗斷
山謂之廣武澗項羽叱婁煩於其上婁煩精魄喪歸矣
濟水又東逕敖山北詩所謂薄狩于敖者也其山上有
城卽殷帝仲丁之所遷也皇甫謐帝王世紀曰仲丁自
亳徙囂于河上者也或曰敖矣秦置倉於其中故亦曰
敖倉城也濟水又東合滎瀆瀆首受河水有石門謂之
爲滎口石門也而地形殊卑蓋故滎播所導自此始也
門南際河有故碑云惟陽嘉三年二月丁丑使河隄謁
者王誨疏達河川遂荒庶土云大河衝塞侵齧金堤以

竹籠石葺葺土而爲埽壞隤無已功消億萬請以濱河
郡徒疏山采石壘以爲障功業旣就徭役用息辛未詔
書許誨立功府卿規基經始詔策加命遷在沈州乃簡
朱軒授使司馬登令纘茂前緒稱遂休功登以伊洛合
注大河南則緣山東過大伾回流北岸其勢鬱濛濤怒
湍急激疾一有決溢彌原淹野蟻孔之變害起不測蓋
自姬氏之所常感昔崇鮁所不能治我二宗之所劬勞
於是乃跋涉躬親經之營之比率百姓議之于臣伐石
三谷水匠致治立激岸側以捍鴻波隨時慶賜說以勸
之川無滯越水土通演役未踰年而功程有畢斯乃元

勳之嘉課上德之宏表也昔禹修九道書錄其功后稷躬稼詩列于雅夫不憚勞謙之勤夙興厥職充國惠民安得湮沒而不章焉故遂刊石記功垂示于後其辭云云使河隄謁者山陽東緡司馬登字伯志代東萊曲成王誨字孟堅河內太守宋城向豹字伯尹丞汝南鄧方字德山懷令劉丞字季意河隄掾匠等造陳畱浚儀邊韶字孝先頌石銘歲遠字多淪缺其所滅蓋闕如也滎瀆又東南流注于沛今無水次東得宿胥水口水受大河渠側有扈城亭水自亭東南流注于濟今無水宿胥在河之北不在此也蓋名同耳自西緣帶山陞秦漢以

來亦有通否濟水與河渾濤東注晉太和中桓溫北伐將通之不果而還義熙十三年劉公西征又命寧朔將軍劉遵考仍此渠而漕之始有激湍東注而終山崩壅塞劉公於北十里更鑿故渠通之今則南瀆通津川澗是導耳濟水於此又兼邲目春秋宣公十三年晉楚之戰楚軍於邲卽是水也音卞全氏曰二字注中注京相璠曰在敖北濟水又東逕滎陽縣北曹太祖與徐滎戰不利曹洪授馬於此處也濟水又東南礫磎水注之水出滎陽城西南李澤澤中有水卽古馮池也地理志曰滎陽縣馮池在西南是也東北流歷敖山南春秋晉楚之戰設伏

于敖前謂是也逕號亭北池水又東北逕滎陽縣北斷
 山東北注于濟世謂之礫石澗即經所謂礫礪矣經云
 濟出其南非也濟水又東索水注之水出京縣西南嵩
 渚山與東關水同源分流即古旃然水也其水東北流
 器難之水注之山海經曰少陘之山器難之水出焉而
 北流注於侵水一清按山海經作役水郭璞曰一作侵即此水也其水北
 流逕金亭又北逕京縣故城西入于旃然之水城故鄭
 邑也莊公以居弟段號京城太叔祭仲曰京城過百雉
 國之害也一清按傳文是都城此句是祭仲泛言先王建侯之制故曰都城道元刪去今京不度句
 直改都城為京城也城北有壇山是趙世家成侯二十年魏獻滎

陽因以為壇臺是也沈氏曰史記魏獻滎椽趙因以為檀臺滎椽木材非地也檀臺是屋

非岡也善長不知何以有此誤考檀臺在襄國見于續漢志而滎陽乃韓地後之為滎陽圖經者因造為檀山以相附會其水亂流北逕小索亭西京相璠曰京有小

索亭世語以為本索氏兄弟居此故號小索者也又為

索水索水又北逕大柵城東晉滎陽民張卓董邁等遭

荒鳩聚流雜堡固名為大柵塢至太平真君年潁州刺

史崔白自虎牢移州治此全氏曰按太平真君下脫山字魏書地形志太平真君八

年滎陽省併屬縣則移治或在是年但是豫州非潁州也又東開廣舊城創制改築

焉太和十七年遷都洛邑省州置郡全氏曰按胡三省

北豫州置東中府非郡也郡固先州置亦非十七年索水又屈而西流與梧桐澗

水合水出西南梧桐谷東北流注于索斯水亦時有通塞而不常流也索水又北屈東逕大索城南春秋傳曰鄭子皮勞叔向於索氏即此城也晉地道志所謂京有大索小索亭漢書京索之間也索水又東逕號亭南應劭曰滎陽故號公國也今號亭是矣司馬彪郡國志曰縣有號亭俗謂之乎咷城全氏曰按乎咷六朝時曰平乎又變而為平而咷又轉而為桃也城內有大冢名管叔冢或亦謂之為號咷城非也蓋號號字相類字轉失實也風俗通曰俗說高祖與項羽戰於京索遁於薄中羽追求之時鳩止鳴其上追之者以為必無人遂得脫及即位異此鳩故

作鳩杖以扶老案廣志楚鳩一名嗥咷號咷之名蓋因鳩以起目焉所未詳也索水又東北流須水右入焉水近出京城東北二里榆子溝亦曰柰榆溝也又或謂之為小索水東北流木蓼溝水注之水上承京城南淵世謂之車輪淵淵水東北流謂之木蓼溝又東北入于須水須水又東北流於滎陽城西南北注索索水又東逕滎陽縣故城南漢王之困滎陽也紀信曰臣詐降楚王宜閒出信乃乘王車出東門稱漢降楚楚軍稱萬歲震動天地王與數十騎出西門得免楚圍羽見信大怒遂亨之信冢在城西北三里故蔡伯喈述征賦曰過漢祖

之所隘弔紀信於滎陽其城跨倚岡原居山之陽王莽立爲祈隊備周六隊之制魏正始三年歲在甲子被癸丑詔書割河南郡縣自鞏闕以東創建滎陽郡并戶二萬五千以南鄉筑陽鄉亭侯李勝字公昭爲郡守故原武典農校尉政有遺惠民爲立祠於城北五里號曰李君祠廟前有石蹠蹠上有石的石的銘具存其略曰百族欣戴咸推厥誠今猶祀禱焉索水又東逕周苛冢北漢祖之出滎陽也令御史大夫周苛守之項羽拔滎陽獲苛曰吾以公爲上將軍封三萬戶侯能盡節乎苛瞋目罵羽羽怒亨之索水又東流北屈西轉北逕滎陽城

東而北流注濟水杜預曰旃然水出滎陽成臯縣東入汜春秋襄公十八年楚伐鄭右師涉潁次于旃然卽是水也濟渠水斷汜溝唯承此始故云汜受旃然矣亦謂之鴻溝水蓋因漢楚分王指水爲斷故也郡國志曰滎陽有鴻溝水是也蓋因城地而變名爲川流之異目濟水又東逕滎澤北故滎水所都也京相璠曰滎澤在滎陽縣東南與濟隧合濟隧上承河水於卷縣北河南逕卷縣故城東又南逕衡雍城西春秋左傳襄公十一年諸侯伐鄭西濟於濟隧杜預闕其地而名之水也京相璠曰鄭地也言濟水

一清按下有脫文

滎澤中北流至垣雍西

與出河之濟會南去新鄭百里斯蓋滎播河濟往復逕通矣出河之濟即陰溝之上源也濟隧絕焉故世亦或謂其故道為十字溝自于岑造入激隄於河陰水脈徑斷故瀆難尋又南會于滎澤旃然水既斷民謂其處為滎澤春秋衛侯及翟人戰於滎澤而屠懿公宏演報命納肝處也全氏曰按杜預曰戰處當在河北非此滎澤也又宣十二年楚潘黨逐魏錡及滎澤即此矣有垂隴城濟瀆出其北春秋文公三年晉士穀盟于垂隴者也京相璠曰垂隴鄭地今滎陽東二十里有故垂隴城即此是也世謂之都尉城蓋滎陽典農都尉治故變垂隴之名矣瀆濟又有沙城城左佩濟瀆竹書紀

年梁惠成王九年王會鄭釐侯于巫沙者也瀆際有故城世謂之-water城非也史記秦昭王三十二年魏冉攻魏走芒卯入北宅即故宅陽城也竹書紀年曰惠成王十三年王及鄭釐侯盟于巫沙以釋宅陽之圍歸釐于鄭者也竹書紀年晉出公六年齊鄭伐衛荀瑤城宅陽俗言水城非矣濟水自澤東出即是始矣王隱曰河決為滎濟水受焉故有濟堤矣為北濟也濟水又東南逕釐城東春秋經書公會鄭伯于時來左傳所謂釐也京相璠曰今滎陽縣東四十里有故釐城也濟水又合黃水黃水發源京縣黃堆山東南流名祝龍泉泉勢沸湧狀

若巨鼎揚湯西南流謂之龍項口世謂之京水也又屈而北注于濟魚水入焉水出石暗澗東北流又北與漑水合水出西谿東流水上有連理樹其樹柞櫟也南北對生凌空交合谿水歷二樹之間東流注于魚水魚水又屈而西北注黃水黃水又北逕高陽亭東又北至故市縣重泉水注之水出京城西南少陘山東北流又北流逕高陽亭西東北流注于黃水又東北逕故市縣故城南漢高帝六年封閻澤赤爲侯國河南之屬縣也黃水又東北至滎澤南分爲二水一水北入滎澤下爲船塘俗謂之郟城陂東西四十里南北二十里竹書穆

天子傳曰甲寅天子浮于滎水乃奏廣樂是也一水東北流卽黃雀溝矣穆天子傳曰壬寅天子東至于崔梁者也又東北與靖水枝津合二水之合爲黃泉北流注于濟水

又東過陽武縣北

濟水又東南流入陽武縣北歷長城東南流蕩蕩渠出焉濟水又東北流北濟也逕陽武縣故城南王莽更名之曰陽桓矣又東爲白馬淵淵東西二里南北一百五十步泉流名爲白馬溝又東逕房城北穆天子傳曰天子里圃田之路東至于房疑卽斯城也郭注以爲趙郡

房子也余謂穆王里鄭圃而郭以趙之房邑為疆更為
 非矣濟水又東逕封邱縣南又東逕大梁城北又東逕
 倉垣城又東逕小黃縣之故城北縣有黃亭俛濟又謂
 之曰黃溝縣故陽武之東黃鄉也故因水以名縣沛公
 起兵野戰喪皇妣于黃鄉天下平定乃使使者以梓宮
 招魂幽野於是丹蛇自水濯洗入于梓宮其浴處有遺
 髮焉故諡曰昭靈夫人因作寢以寧神也濟水又東逕
 東昏縣故城北陽武縣之戶牖鄉矣漢丞相陳平家焉
 平少為社宰以善均肉稱今民祠其社平有功於高祖
 封戶牖侯是後置東昏縣也王莽改曰東明矣濟水又

東逕濟陽縣故城南故武父城也城在濟水之陽故以
 為名王莽改之曰濟前者也光武生濟陽宮光明照室
 即其處也東觀漢記曰光武以建平元年生於濟陽縣
 是歲有嘉禾生一莖九穗大于凡禾縣界大熟因名曰
 秀

又東過封邱縣北

北濟也自滎澤東逕滎陽卷縣之武修亭南春秋左傳
 成公十年鄭子然盟于修澤者也鄭地矣杜預曰卷東

有武修亭

一清按方輿紀要原武縣有武修亭或以為
 修魚也秦紀惠文王後七年韓魏燕齊率匈

奴共攻秦秦使樗里疾與戰於修魚今本左傳成十年
 註作修武修武在河北漢屬河內郡卷在河南漢屬河

南郡則此宜是武修亭而非修武縣板本為誤也故卷城在原武縣北七里

武縣故城南春秋之原圃也穆天子傳曰祭父自圃鄭

來謁天子夏庚午天子飲于滄上乃遣祭父如圃鄭是

也王莽之原桓矣濟瀆又東逕陽武縣故城北又東絕

長城鄭築也案竹書紀年梁惠成王十二年龍賈率師

築長城于西邊自亥谷以南鄭所城矣竹書云是梁惠

成王十五年築也郡國志曰長城自卷逕陽武到密者

是矣濟瀆又東逕酸棗縣之烏巢澤澤北有故市亭晉

太康地記曰澤在酸棗之東南昔曹太祖納許攸之策

破袁紹運處也濟瀆又東逕封邱縣南燕縣之延鄉也

其在春秋為長邱焉應劭曰左傳宋敗狄于長邱獲長

狄緣斯是也漢高帝封翟盱一清按此處有闕文史漢

七月封衍地闕酈氏以盱封在延鄉未知所據且其事

古傳有明徵矣地理志封邱縣注孟康曰春秋傳敗狄

于長邱今翟溝是攷封邱縣志云翟溝者因翟母得名

漢高祖與項羽戰敗于延鄉有翟母者免其難也又魯

國都記云封邱衛地之延鄉漢高祖與項羽戰敗遇翟

母免難之處後以延鄉為封邱縣以封翟母即此地也

然則封于延鄉者是翟母非翟盱也又按史漢表侯功

狀云盱以漢王二年為燕令又堅守燕侯

豈燕即衍聲音之轉字從而變未可知也

瀆又東逕大梁城之赤亭北而東注

又東過平邱縣南

北濟也縣故衛地也春秋魯昭公十三年諸侯盟于平

邱是也縣有臨濟亭田儋死處也又有曲濟亭皆臨側

濟水

又東過濟陽縣北

北濟也自武父城北闕駟曰在縣西北鄭邑也東逕濟

陽縣故城北圜稱陳畱風俗傳曰縣故宋地也竹書紀

年梁惠成王三十年城濟陽漢景帝中六年封梁孝王

子明為濟川王應劭曰濟川今陳畱濟陽縣是也

又東過冤胸

一清按漢志作冤句師古曰音劬

縣南又東過定陶縣南

南濟也濟水自濟陽縣故城南東逕戎城北春秋隱公

二年公會戎于潛杜預曰陳畱濟陽縣東南有戎城是

也濟水又東北荷水東出焉濟水又東北逕冤胸縣故

城南呂后元年封楚元王子劉執為侯國

朱氏謀瑋箋曰按漢表景

帝封王莽之濟平亭也濟水又東逕秦相魏冉冢南冉秦

宣太后弟也代客卿壽燭為相封于穰益封于陶號曰

穰侯富于王室范睢說秦秦王悟其擅權免相就封出

關輜車千乘卒于陶而因葬焉世謂之安平陵墓南崩

碑尚存濟水又東北逕定陶恭王陵南漢哀帝父也帝

即位母丁太后建平二年崩上曰宜起陵于恭皇之園

送葬定陶貴震山東王莽秉政貶號丁姬開其槨戶火

出炎四五丈吏卒以水沃滅乃得入燒燔槨中器物公

卿遣子弟及諸生四夷十餘萬人操持作具助將作掘平恭王母傅太后墳及丁姬冢二旬皆平莽又周棘其處以為世戒云時有羣鸞數千銜土投于丁姬窀中今其墳冢巍然尚秀隅阿相承列郭數周面開重門南門內夾道有崩碑二所世尚謂之丁昭儀墓又謂之長隧陵蓋所毀者傅太后陵耳丁姬墳墓事與書違不甚過毀未必一如史說也墳南魏郡治也世謂之左城亦名之曰葬城蓋恭王之陵寢也濟水又東北逕定陶縣故城南側城東注也縣故三鬲國也湯追桀伐三鬲即此周武王封弟叔振鐸之邑故曹國也漢宣帝甘露二年

更濟陰為定陶國王莽之濟平也戰國之世范蠡既雪會稽之恥乃變姓名寓之于陶為朱公以陶天下之中諸侯四通貨物之所交易也治產致千金富好行德子孫修業遂致巨萬故言富者皆曰陶朱公也

又屈從縣東北流

南濟也又東北右合菏水瀆水上承濟水於濟陽縣東世謂之五丈溝又東逕陶邱北地理志曰禹貢定陶西

南有陶邱陶邱亭在南

一清按地理志濟陰郡定陶縣禹貢陶邱在西南陶邱亭今注

以禹貢二字冠定陶之上非是又陶邱亭下似今本漢書脫在南二字當以此文補之墨子以為

釜邱也竹書紀年魏襄王十九年薛侯來會王于釜邱

者也尚書所謂導菏水自陶邱北

一清按尚書禹貢導沅水下是東出于陶

邱北又東至于菏善長所引顛倒之矣

謂此也菏水東北出於定陶縣北

屈左合汜水汜水西分濟瀆東北逕濟陰郡南爾雅曰濟別為澆呂忱曰水決復入為汜廣異名也汜水又東合于菏瀆昔漢祖既定天下即帝位於定陶汜水之陽張晏曰汜水在濟陰界取其汜愛宏大而潤下也汜水之名於是乎在矣汜水又東北逕定陶縣南又東北右合黃水枝渠渠上承黃溝東北合菏而北注濟瀆也

水經注釋卷七終

卷之五